

**EKALESIA FAAPOTOPOTOGA KERISIANO SAMOA**

**TUSI MO FAIAOGA O A'OGA ASO SA  
(SUNDAY SCHOOL TEACHERS TEXTBOOK)**



**VASEGA LAITI  
(8 – 10 tausaga)**

**2 0 2 3**

**MATAGALUEGA O A'OA'OGA KERISIANO**

**EKALESIA FAAPOTOPOTOGA KERISIANO SAMOA**

CONGREGATIONAL CHRISTIAN CHURCH SAMOA

**TUSI MO FAIA'OGA O AOGA ASO SA**

SUNDAY SCHOOL TEACHERS' TEXTBOOK

**2023**



**VASEGA LAITI**

ELEMENTARY CLASS

(8 – 10 tausaga)

**MATAGALUEGA O A'OA'OGA KERISIANO**

DEPARTMENT OF CHRISTIAN EDUCATION

## **UPU TOMUA**

E mua'i faatalofa ma faafeiloai atu i le paia tele o le Ekalesia Faapotopotoga Kerisiano Samoa i ona tulaga faalupeina, i le Suafa pele o Iesu Keriso lo tatou Taitai Sili. Ua faamalo le soifua manuia ia outou susuga i Toeaina, susuga i Faafeagaiga, Faifeau, A'oa'o ma Faletua, tainane foi afioga i Tiakono, susuga i alii ma tamaitai Faiaoga o tatou Aoga Aso Sa, faapea foi peresetene ma taitai o tatou Autalavou. Ia viia lo tatou Alii, i la outou molimau atu, o fita i tuga ai mo le Alii ma le Tala Lelei, e ala atu i mataupu a le Aoga Aso Sa ma Autalavou.

Ua tatou talitonu, o le Tusi Paia o le Upu a le Atua mo tagata uma, ma ua i ai i totonu vaega uma ua tatou naunau ia iloa, ina ia tumau mausali pea lo tatou sootaga lelei ma le Atua, ma ia tatou ola ai i le ala tatau e tusa ma lona finagalo. O le mea lea ua tatou talitonu ai, i le matuā taua o le a'oa'oina tatau o fanau laiti ma talavou mai le Tusi Paia. E ao ina a'oa'oina atu ma le faautauta lelei, le uiga moni o vaega o le Tusi Paia ua fia a'oa'oina atu, i se auala talafeagai e tusa ma le matutua ua i ai tamaiti.

1. O le Tusi o Aoga Aso Sa ma Autalavou, ua saunia lava faapitoa mo Aoga Aso Sa ma Autalavou a le Ekalesia Faapotopotoga Kerisiano Samoa. O lona uiga o le meatotino lava a le EFKS, e le faatagaina faaletulafono ona toe lomia e se tasi, e aunoa ma le faatagaga a le Ekalesia. O lea e fautuaina ai foi le Aufaigaluega, o faiaoga o Aoga Aso Sa ma Taitai o Autalavou, i le taua o le teu faalelei pea o Tusi Aoga, e toe saili i ai mo se fesoasoani pe a mommia.
2. O Mataupu o Tusi Aoga Aso Sa ma Autalavou 2023, ua maua lea i le upega Tafailagi (website) a le EFKS; [www.cccs.org.ws](http://www.cccs.org.ws). Faamolemole ia fesootai mai lo tatou Ofisa i Mulinuu mo se fesoasoani, ma nisi vaega e fia malamalama i ai, i le telefoni 24340, po o le [e-meli-extneduc@cccs.org.ws](mailto:e-meli-extneduc@cccs.org.ws).
3. Ua lē o toe fa'aalia i le faasologa o Mataupu i Aso Sa taitasi, vaega masani o le a'oa'oina o mataupu, e pei o le Tatalo Amata, Faafeiloai le vasega, faamanatu mataupu talu ai, tatalo e faapaia ai le sene ma le Tatalo Faaiu. Peitai o vaega masani nei e tatau lava ona fai i Mataupu o Aso Sa taitasi. Ua tuuina atu i Tusi Aoga Aso Sa a le Vasega Amata, Vasega Laiti, ma le Vasega Feololo, fati o pese (nota) fou mo nisi o mataupu.
4. Mo le silafia e Tamā o le Ekalesia ma le aufaigaluega faifeau, e i ai le taimi e toe saili mai ai e lo outou mamalu le ofisa o le MAK, mo nisi Tusi Aoga. Peitai, ua māua e le ofisa nei, o nisi tagata, e lē o ni tagata lotu iā tatou, auā latou te leiloa le suafa o lana faifeau. O lea e tatalo atu ai, o le a lē toe taliaina ni tagata faapea e omai i ni Tusi, sei vagana faafeagaiga ma ē omai ma se faamaoniga mai lana faifeau. E lē mafai foi ona faamatuu atu ni Tusi Aoga i nisi o la matou aufaigaluega e aunoa ma se faamaoniga mai le faifeau.
5. Afai ua i ai se lape i le galuega nei, e matua atu i la outou tofā faale-Atua e magalo ai le aufaigaluega vaivai. Pe afai foi e i ai ni fautuaga taua mo le faaleleia atili o le galuega, faamolemole fesoota'i mai lo tatou Ofisa i tuatasi o i luga, pe lafo mai i le Pusa meli 163, Apia.
6. Ua saunia le Tusi Aoga mo le Vasega Amata 2023, e le susuga ia Panapa Alafau FS, Vaegato'oto'o Magele FS, Falealii Afamasaga FS ma Tavita Pulu AM.

Ia faamanuia le Atua i le galuega o lenei tausaga, auā le a'oa'oina o alo ma fanau a le Ekalesia, ina ia tutupu a'e ma le fiafia e faitau le Tusi Paia ma ola matata'u i le Atua.

Soifua ma ia manuia  
O la outou auauna

*Maseifua Taniesu*  
**(Faatonu A'oa'oga Kerisiano)**

## AUIVI VASEGA LAITI 2023

**MANATU AOAO: IA AVEA LE ATUA MA TAIALA I LE OLAGA**

**IANUARI MA FEPUARI: TAITAIINA I LE FAATUATUA.**

29 Ua mata'u Aperaamo I le Atua Kenese 22: 11 – 13  
**(Aso Sa Tupulaga)**

**FEPUARI:**

5	Ua faamalolo e Iesu le auauna	Luka 7: 1 – 10
12	Ua manumalo Tavita ia Koliata	1 Samuelu 17: 44 – 50
19	Soloia i lalo pa o Ieriko	Iosua 6: 4 – 5
26	O le na i ai taleni e lima	Mataio 25: 20 – 21

**MATI: FAALOGO MA USITAI**

5	Tulafono e lima	Esoto 20: 12
12	Malumalu: O le fale Tatalo	Mataio 21: 12 – 13
19	Ua lē usitai Iona i le Atua	Iona 1: 1 – 6
26	Ua usitai le matagi ma le vai ia Iesu	Luka 8: 22 – 25

**APERILA: E ALOFA MAI LE ATUA IA TE I TATOU**

2	O le Malaga faatupu a Iesu i Ierusalema	Mareko 11: 1 – 10
	<b>(Aso Sa Laupama)</b>	
9	Ua asiasi tinā i le tuugamau	Luka 24: 1 – 12
	<b>(Aso Sa Toetu)</b>	
16	O le manai mai le Atua	Esoto 16: 2 – 4
23	Fafagaina e Iesu le limagaafe o tagata	Mataio 14: 15 – 21
30	Iosefa le faamatala miti	Kenese 41: 25 – 36

**ME: IA FAAMAONI I LE ATUA**

7	Ua faasaoina Sataraka, Mesako ma Apeteniko	Tanielu 3: 20 – 27
14	Ua agalelei le fafine Sarefata	1 Tupu 17: 8 – 16
	<b>(Aso Sa Tinā)</b>	
21	<b>FONO TELE</b>	
28	Ua savali Iesu i luga o le vai	Mareko 6: 49 – 51

**IUNI: O LE ATUA LE TAIALA SILI**

4	Ua faia e Arona le tamai povi Auro mo Isaraelu	Esoto 32: 1 – 6
11	O le na i ai taleni e lua	Mataio 25: 22 – 23
18	Ua lafoina Tanielu i le lua o Leona	Tanielu 6: 16 – 24
25	O le tagata poto ma le tagata valea	Mataio 7: 24 – 27

### IULAI: IA MATAALA I TAIMI UMA

2	Ua agalelei Iosefa i ona uso	Kenese 50: 15 – 21
9	Ia loto faamagalō	Mataio 6: 14 – 15
16	O le tautoga a Iefata i le Atua	Faamasino 11: 29 – 31
23	Ua tulia i fafo le na i ai le taleni e tasi	Mataio 25: 24 – 30
30	Ua faamaloloina Naamanu le Suria	2 Tupu 5: 8 – 14

### AOKUSO: TUMAU I LE ATUA

6	Ua faafiti faatolu Peteru ia Iesu	Ioane 18: 25 – 27
13	E tumau pea Iosua i le Atua <b>(Aso Sa Tamā)</b>	Iosua 24: 14 – 16
20	O le vine moni ma ona la	Ioane 15: 1 – 10
27	Ua mana'o Aapo i le tovine a Napota	1 Tupu 21: 1 – 10

### SETEMA: FAALAGOLAGO I LE ATUA

3	Ua fa'aali Iesu i lona auso'o <b>(Aso Sa Tala Lelei)</b>	Luka 24: 36 – 43
10	Ua faalagolago Elia i le Atua	1 Tupu 18: 36 – 39
17	Ua savali le pipili	Galuega 3: 1 – 10
24	Ua valaau le Atua ia Mose	Esoto 3: 4 – 10

### OKETOPA: FAALAGOLAGO I LE ATUA

1	Tapenaga Lotu Tamaiti	
8	<b>LOTU TAMAITI</b>	
15	Malologa Lotu Tamaiti	
22	Ua faamanuia Iesu i tamaiti	Mareko 10: 13 – 16.
29	Ua faalototele Iosua ma Kalepo i le nuu	Numera 14: 1 – 10

### NOVEMA: FAATALITALI MA LE FAATUATUA

5	O taupou e toasefulu	Mataio 25: 1 – 13
12	Ua fa'aali le agelu ia Palaamo	Numera 22: 26 – 33
19	O Iesu le leoleo mamoe lelei	Ioane 10: 11 – 18
26	Ua tatalo Hana i le Atua	1 Samuelu 1: 9 – 18

**TESEMA: UA IA TE I TATOU LE ATUA**

3	O Ioane le Papatiso	Mareko 1: 4 – 8
10	Ua fa'aali le agelu ia Maria	Luka 1: 26 – 35

## **MANATU TAIALA IANUARI & FEPUARI: TAITAIINA I LE FAATUATUA**

E a'oa'oina ai tatou, so o se mea faigata e oo mai iai tatou, ia tumau pea lo tatou faatuatua ma le talitonu i lo tatou Atua Soifua.

**ASO SA:** **29 IANUARI 2023 (ASO SA TUPULAGA)**

**MATAUPU:** **UA MATA'U APERAAMO I LE ATUA**

**SINI:** Ia malamalama le vasega, o le tamaititi e ola mata'u i le Atua, e faamanuiaina lona olaga.

**TUSI FAITAU:** Kenese 22: 11-13.

### **FESOASOANI MO FAIAOGA:**

O ai le tamā o le au faatuatua? O ai lona atalii lea na ave e osi ai le taulaga? Tasi lea o tofotofoga matautia na oo ia Aperaamo. Peitai, e le i mafaia e ia mea ona faavaivai ai le ola mata'u o Aperaamo i le Atua. Ana faapea o se isi o i tatou, o le a sou manatu? Ailoga e faigofie i se matua ona faamatuu se atalii poo se afafine i se tulaga faapea.

Ae ui i lea, sa usitai lava Aperaamo i le faatonuga ua fetalai ai le Atua, ina ia faataunu. E le i avea ona manatu faale-tagata, e tuu ai le finagalo o le Atua. O le mea moni, e le i faigofie ia Aperaamo, auā o si ona atalii e toatasī, ae sau le faatonuga ia osi ai le taulaga.

Faimai e sauni atu o le a fasioti lona atalii, ae vavao mai le agelu ia te ia. "Soia le o'o lou lima i le tama, aua foi te fai se mea e tasi ia te ia, auā ua ou iloa nei ua e mata'u i le Atua." Tamaiti, ua tepa a'e Aperaamo, o lo o lavelavea le mamoe po'a i ona tua, ona aumai lea ua osi ai le taulaga i le Atua, e sui a'i lona atalii o Isaako. Tamaiti, o le usitai o Aperaamo i le Atua, o atagia ai le tagata usitai ma faalogo i le Atua.

### **Uiga o Upu:**

- i) mata'u - fiafia e ola i ala o le Atua / fiafia i le taitaiga o le Mana o le Atua.
- ii) polo - naifi

### **GALUEGA FAATINO:**

Tali Fesili: O Aperaamo o se;

- tagata ola mata'u i le Atua?
- tagata amio Atua?
- tagata e alofa?

**PESE:** Aperaamo tamā, ma lana fanau.

## A'OA'OGA:

1. Faalogo ma Usitai i le Atua.
2. Ia ola matata'u i le Atua.

## O LE TAULAGA A APERAAMO NA FAIA I LE ATUA



---

**ASO SA:** **5 FEPUARI 2023**

**MATAUPU:** **UA FAAMĀLŌLŌ E IESU LE AUAUNA**

**SINI:** Ia malamalama tamaiti, e tatau ona agalelei atu i e o fia maua se fesoasoani.

**TUSI FAITAU:** Luka 7: 1-10

**FESOASOANI MO FAIAOGA:**

E i ai se tamaititi na e fesoasoani ai i totonu o lau aoga, o lou aiga po o lou nuu? E tatau lava ona tatou faia se galuega fesoasoani mo lē o lo o tīgaina. Lona uiga, e tatau lava ona tatou agalelei atu i tamaiti po o se isi o lo o mafatia pei ona faia e Iesu.

E tulaga ese le ta'ita'i o le toaselau ma lana auauna o lo o feagai ma ma'i. Ua aami e le ta'ita'i o le toaselau Iesu ina ia faamalolo i lana auauna, ua tali oti. O le tala sa faitauina tamaiti, ese le fa'aaloalo o nei tagata ia Iesu a o femalagai solo Iesu e a'oa'o atu i tagata. Aua' e lē oni tagata Iutaia, o tagata o nuu-ese, ae ese le tulagaese o le ola faatuatua o tagata ia Iesu. A o le naunautaiga lea o Iesu, ina ia laveaiina ma ofo atu le fesoasoani i lē o mafatia. Auā faimai le tala, sa ofo Iesu i saunoaga a nei tagata ma le latou tali fa'aaloalo ia te Ia.

Tamaiti, e le iloa e tagata na tautatala ma Iesu, ua mālōlō le auauna. O le pa'i mai o Aao faamālōlō o Iesu, o le oo mai lava lea o le mafanafana o le Atua e aveesea ai so o se ma'i faigata i le tagata.

**Uiga o Upu:**

- i) faapelepeleina - alofaina
- ii) faaola - faamālōlō
- iii) sunako - falesa/fale-tapua'i

**GALUEGA FAATINO: Sailiga o Upu (Puzzle)**

Kapanumi, auauna, taitai, faatoga, faamaloloina, faatuatua.

F	a	a	m	a	l	o	l	o	i	n	a	a
f	m	n	s	l	i	a	m	g	t	u	e	a
t	a	t	g	a	p	u	u	a	t	p	v	a
a	p	a	t	v	a	p	h	a	k	v	o	f
a	g	i	t	n	p	a	u	a	u	u	v	u
l	a	a	a	u	u	t	u	m	u	n	n	a
t	p	p	n	e	a	e	k	o	a	o	a	s

l	a	e	a	a	v	n	p	h	o	n	p	e
k	v	s	f	f	a	a	t	o	g	a	s	i

**PESE:** O lima o Iesu, o lima agalelei, e alofa i tagata uma.

Faamalolo i tagata mama'i ma faamanuia i tamaiti

O nai ona lima e auauna atu, e tali le valaau.

**A'OA'OGA:**

1. O Iesu le Foma'i Sili.
2. Fesoasoani i tagata mama'i.
3. E agalelei Iesu i tagata mama'i.

## **O IESU MA LE MOTU O TAGATA**



**ASO SA:**           **12 FEPUARI 2023**

**MATAUPU:**       **UA MANUMĀLO TAVITA IĀ KOLIATA**

**SINI:**              Ia malamalama le vasega, na manumālo Tavita aua sa faalagolago i le Atua.

**TUSI FAITAU:**     1 Samuelu 17: 44–50

**FESOASOANI MO FAIAOGA:**

O le tatou tala o lenei aso Sa, o le tala ia Tavita ma Koliata. O ai foi Koliata? O le toa o Filisitia. O le taimi lava na faalogo ai Tavita i le leo o Koliata; e le i toe nofo lelei i le ita, ona ua faifai Koliata i lona Atua.

A o savali mai Koliata le toa o Filisitia o le a tau ma Tavita, na inoino o ia iā Tavita ina ua na iloa atu, o ia o se tamaitiiti. Ua alaga atu le Filisitia iā Tavita, ‘Ou te se ulī ea a’u, ina ua e sau ia te a’u ma tootoo?’ Ae ua tali atu Tavita i le Filisitia – ‘Ua e sau ia te a’u ma le pelu, ma le tao, ma le tao-leoleo, a o a’u, ou te alu atu ia te oe i le suafa o le Alii o ‘au, o le Atua o le itu taua a Isaraelu ua e faifai i ai.

Tou te iloa la tamaiti, na ona tago ifo lava o Tavita i lana ato, ua ava’e ai se ma’a, ua sasau lana ma’atā, ma lavea ai loa le Filisitia i lona muāulu. Na goto le ma’a i lona muāulu. Ua pa’ū faō i le eleele ma oti ai. Ua manumalo Tavita i le taua, auā sa faalagolago i le suafa o lona Alii. O lona Alii lava na tau mo ia i le taua. Tamaiti, tatou te manumalo i mea uma, pe afai tatou te faalagolago i lona auai mai.

### **Uiga o Upu ma Fuaitau:**

- i) le Alii o ‘au - le Alii e puipui I lona malosi tele
- ii) faataalise - faavave ona alu atu
- iii) ulī - taifau

### **GALUEGA FAATINO: ‘Sa’o po o le Sese’**

Tali mai faamatalaga o i lalo i le ‘sa’o’ po o le ‘sesē’

1. Sa faamoemoe Tavita ia te ia lava. (sesē)
2. Na matuā fefe lava Tavita i le Filisitia. (sesē)
3. Na alu ane le Filisitia ma lana pelu ma le tao e tau ai ma Tavita. (sa’o)
4. O le vaai a Tavita i le Filisitia, ua pei lava o se ulī. (sa’o)

### **PESE: (fati:- ‘Faalagolago i aao o Iesu)**

O Tavita loto tele, Na alu atu e le i fefe  
E tau ma Koliata, o le toa uiga ese  
O le suafa o le Alii, na toilalo ai le fili  
Faalagolago i Aao o le Alii

Tali: Faalagolago, faalagolago  
Faalagolago i Aao o Iesu(x 2)

### **A’OA’OGA:**

1. Faalagolago ia Iesu e manuia ai.
2. Aua le ola faamaualuga.

## **TAVITA MA KOLIATA LE TOA O FILISITIA**

# David and Goliath



**UA MANUMALO TAVITA IA KOLIATA**



Download from  
**Dreamstime.com**

This watermarked comp image is for previewing purposes only.



ID 20855934

© Anton Brand | Dreamstime.com

**MATAUPU:** SOLOIA I LALO PA O IERIKO

**SINI:** Ia malamalama tamaiti, po o le a le malosi ma le poto o le tagata, e i'u lava i le vaivai.

**TUSI FAITAU:** Iosua 6: 4-5

**FESOASOANI MO FAIAOGA:**

E lē faigofie ia Iosua se fuafuaga o le aea o le aai o Ieriko. O se aai e malu puipuia i ona aupā maualuluga ma le malolosi. A o fuafua e Iosua ma Isaraelu se auala e osofaia ai Ieriko, ae fetalai mai le Atua ia Iosua ma failoa mai ai le auala e faatamaia ai Ieriko. O se faatonuga e faapupula atili ai i tagata lona finagalo paia, i le ola tapuai ma le ola talitonu i le Atua.

A lea e manino, ina ua fa'aaogaina ositaulaga ma faaogatotonu le atolaau a le Atua, atoa ma le ilia o pu ma faataamilo faafitu i le aai. O le ola faapaupau o le nuu o Kanana, na matuā ogaoga ai le matautia o le mea na faia e le Atua ia Ieriko. Tamaiti, faimai a faalologo loa Isaraelu i le leo o pu, ona alalaga loa lea ona solo ai lea i lalo o pa o le aai.

Tamaiti, o le nuu faamaualuluga ma ona aupā malolosi, e leai se isi na te sopoina. A o le Mana o le Atua e lē vaaia ua soloia ai i lalo pa o Ieriko. E le o leo o tagata, ae o le malosi o le mana o le Atua ua manumalo ai.

**Uiga o Upu:**

- i) faitaulaga - o e ua filifilia e osia taulaga i le Alii
- ii) atolaau - nofoaga/afioaga o le Atua/feagaiga

**GALUEGA FAATINO:** Faatumu avanoa

Faitaulaga, toafitū, atolaau, iupeli, solo

f	a	a	f	a	i	t	a	u	l	a	g	a
f	m	n	i	l	i	a	m	g	t	u	e	a
t	a	t	u	a	p	u	u	u	t	p	v	a
a	p	a	p	v	a	p	h	a	k	v	o	f
a	g	i	e	n	p	a	u	a	u	u	v	u
l	s	o	l	o	u	t	u	l	u	n	n	a
t	p	p	i	e	a	e	k	o	a	o	a	s
l	a	e	a	a	v	n	p	t	o	n	p	e
k	v	s	f	f	a	t	o	a	f	i	t	u


**PESE:** Solo i lalo, Solo i lalo

Pa o Ieriko, Pa o Ieriko, Pa o Ieriko

**A'OA'OGA:**

1. E ofoofogia mea e faia e le Atua.
2. Ia ola tapuai ma ola faatuatua i le Atua.
3. Talitonu i le Atua i taimi uma.

**UA SOLO I LALO PA O IERIKO**



\*\*\*\*\*

**ASO SA:**

**26 FEPUARI 2023**

**MATAUPU: O LĒ NA I AI TALENI E LIMA**

**SINI:** Ia malamalama le vasega, i le tāua o le ola faamaoni.

**TUSI FAITAU:** Mataio 25: 20-21

**FESOASOANI MO FAIAOGA:**

O le a lau taleni (piki tamaiti ma latou taleni) Tamaiti, o le na i ai taleni e lima, ua alu ma fa'aaoga tatau. O le faataoto lea a Iesu, na ia faamatalaina ai le manuia o le tamaititi faamaoni, ma le tamaititi le faamaoni. Faimai e toatolu auauna na tuuina i ai taleni ona o le a alu malaga le matai. O le isi auauna e lima, o le isi e tolu, ae o le isi auauna, e tasi, ma le naunautaiga a le matai, ia fa'aaoga lelei, ma faamaoni i le tausia lelei o taleni ua tuuina mai.

Peitai, ua oo ina sau lē na iai taleni e lima, oka oka se manaia, faimai ua maua isi taleni e lima. Aua foi sa galue faamaoni ma faaaoga lelei le avanoa ua tuuina atu e le matai e galue ai. A o le finagalo lea o Iesu, o lona faaaogaina lelei, ma faamaoni i mea itiiti.

Tamaiti, po o le ā so ta vaivai, pau le mea o finagalo i ai Iesu, ia faamaoni ma ola taumafai mo le Atua. Le auauna lelei, ma le faamaoni, ua e faamaoni i nai mea itiiti, ulufale mai ia i le fiafia o lou Alii.

**Uiga o Upu:**

- i) faamaoni - fai ia mae'ae'a lelei feau
- ii) auauna - tagata ua galue faamaoni mo leisi uso

**GALUEGA FAATINO:**

Manaia pe a fai se faatalatalanoaga ma tamaiti, e fesiligia ai e le faiaoga le taua o taleni mai le Atua.

**PESE:** Lima taleni na tuuina mai ou te galue ai.

**A'OA'OGA:**

1. Ia tumau i le Alii ma le faamaoni.
2. Galulue ma le faamaoni.

## UA TUFATUFAINA TALENI I AUAUNA



---

MANATU TAIALA O MATI: FAALOGO MA USITAI

Tamaiti, ia avea i tatou ma ave feau o le Tala Lelei, ma ia tatou toaaga e faalogo ma usita'i i le Atua ma lona finagalo.

**ASO SA:** **5 MATI 2023**

**MATAUPU:** **TULAFONO E LIMA**

**SINI:** Ia malamalama tamaiti, e manuia le tamaititi e faalogo ma usitai i matua.

**TUSI FAITAU:** Esoto 20: 12

**FESOASOANI MO FAIAOGA:**

Ese le manaia tamaiti o lenei tulafono mo tatou tamaiti. O se tulafono e taua ma e tatau lava ona tatou faia tatou te manuia ai.

“Ia e ava i lou tamā ma lou tinā, ina ia faalevaleva ai ou aso i le nuu o le a foa’iina mai e le Alii lou Atua ia te oe.” Tamaiti, o le ava, o lou faalogo ma lou usitai lea i ou matua. Auā faimai tamaiti, a e usitai ma faalogo, o le umi foi lena o ou aso e te ola ai. Faimai e te maua le mea lelei ma iu lelei lau aoga ma maua le poto, pe a e faalogo ma usitai i ou matua.

Tamaiti, e fiafia Jesu pe afai tatou te faalogo ia te Ia i aso uma. O le mata'u i le Atua tamaiti, o le amataga lea o le poto. E lē maua i le tiai aoga, e lē maua i le fia tama matua. Ae maua i le mata'u i le Atua ma toaga i le lotu, e te poto ai. E te maua i lou fa'aaloalo ma lou usitai i matua.

**Uiga o Upu:**

- |                 |   |                   |
|-----------------|---|-------------------|
| i) ava          | - | fa'aaloalo/usitai |
| ii) faalevaleva | - | taimi umi/manuia  |

**GALUEGA FAATINO:**

Manaia ae toe faamanatu i tamaiti tulafono e 10 (galulue faatasi iai le faiaoga ma tamaiti)

**PESE:** Faauta, faauta, ou te tu le faitotoa ma ou tuitui mai  
O ai se tama e faalogo i lou leo, O ai se teine faalogo i lou leo  
Tatala Tatala lou Agaga ou te ulufale atu ai.

**A'OA'OGA:**

1. Faalogo ma usita'i i matua.
2. Ia ava i matua.
3. E manuia le tamaititi faalogo ma usitai.

## **O LE TULAFONO E LIMA**

Honor your father  
and your mother,  
that your days  
may be long.

Exodus 20:12



©www.TotalityBooks.com

\*\*\*\*\*

**ASO SA:** 12 MATI 2023

**MATAUPU:** O LE MALUMALU, O LE FALE TATALO I LE ALII

**SINI:** Ia malamalama tamaiti, o le malumalu o le fale e tapuai ai tagata uma i le Atua.

**TUSI FAITAU:** Mataio 21: 12-13

**FESOASOANI MO FAIAOGA:**

Talofa tamaiti. Ese le toaaga o tatou i le lotu. O le a le fale tatalo? O le falesa. O le Mauga o le Atua. O le fale e tapuai ai tagata uma i le Atua. O le fale e manuia ai tatou uma, pe afai tatou te toaaga e ā ai e tapuai ma tatalo ai.

I le tatou tala sa faitauina, tamaiti ese le leaga o nei tagata ma latou faatinoga o loo fai i totonu o le fale o le Atua. O tagata ua latou le iloa le Atua. Ua leai se faaaloalo. Ua leai se manatu mamafa i le Maota o le Atua. Ai o le ala lea na tapena ai e le Atua le malaga agai i Ierusalema, ona o le faaletonu o lo o tupu. E le gata o lona fia auai i le tausamiga o le paseka, ae sei afio e vaavaai pe sa'o tala e uiga i amioga a tagata. Peitai e oo mai atu Iesu, ua fai le malumalu ma fefaatauaiga a tagata.

Ua toatamai Iesu ma fuli i lalo laulau ma nofoa o e na faatau lupe ma tutuli i fafo, ma faapea atu Iesu, “Ua tusia, E taua lou fale, o le fale tatalo, a ua faia e outou ma ana o e fao mea.” Tamaiti, o le falesa o le fale e paia ma mamalu. A tatou ā i le falesa, aua le pisa aua o lo o tapuai tagata i le Atua.

**Uiga o Upu:**

- i) malumalu - fale o le Atua/falesa/fale tapuai
- ii) fefaatauai - fesuia'i, faatau
- iii) fuli - tulei i lalo

**GALUEGA FAATINO:**

Tusi mai ni amioga se lima e tatau ona faia i le falesa ma ni amioga e lē tatau ona faia.

**PESE :** A'oa'o le pese i tamaiti.

Ou te fia alu i le falesa  
E vivii ma tatalo i le Tamā  
A o Satani faaosooso mai

**A'OA'OGA:**

1. Fa'aaloalo i le Atua.
2. Fiafia e alu i le falesā

**UA FULI I LALO E IESU LAULAU A E NA FAATAU OA  
I LE MALUMALU**



\*\*\*\*\*

**ASO SA:**           **19 MATI 2023**

**MATAUPU:**       **UA LĒ USITAI IONA I LE ATUA**

**SINI:** Ia malamalama tamaiti, i le taua o le ola usitai.

**TUSI FAITAU:** IONA 1: 1 – 6

**FESOASOANI MO FAIAOGA:**

O ai foi lea na folo e le I'a? Ae fia foi po na i ai Iona i le manava o le i'a? O Iona tamaiti, sa lē faalogo ma usitai i le faatonuga a le Atua ina ia alu i Nineva, ona ua agasala tele le nuu I luma o le Atua. O le a le mea ua tupu ia Iona tamaiti? Ua sola ua alu i le vaa e alu i Tasesa.

Le leaga o le tagata le usitai i le Atua. Ua agi mai le matagi tele ua sou ai le vasa. Faimai tamaiti ua fefefe le auvaa aua o le a goto le vaa, ona matata'u ai lea ma taitasi ma valaau i le Atua. Ua taitasi foi ma lafo i lalo oloa ina ia faamāmā ai le vaa, ae peitai e leai lava se suiga o le matagi, ae o lo o moe lava Iona. Na lagona le popole o nei tagata ona o la latou gaioiga na faia ia Iona, peitai sa finagalo lava i ai le Atua ina ia aveese mai Iona mai le vaa ina ia alu lava i Nineva.

O se a'oa'oga lelei foi mo tatou le fanau. Ia tatou maua le ola usiusitai i le Atua e ala atu i o tatou matua ma e matutua, auā afai tatou te lē usiusitai i le Atua, o le a mautinoa lava e feagai i tatou ma ni faafitauli.

Tamaiti, afai ua tatou iloa ua tatou sesē i lo tatou va ma le Atua, ia tatou lagona le salamō ma faatoese i le Atua e ala i le tatalo. Manaia le tala ia Iona e fai ma fa'aa'oa'o ia te i tatou, i le leaga o le ola lē usiusitai i le Atua.

**Uiga o Upu:**

- i) lepetia - afaina/faaleagaina
- ii) matata'u - talitonu/fefe

**GALUEGA FAATINO:** 1.AIGA                    2.LOTU                    3.TAALOGA


Filifili i nofoaga e tolu i luga, le mea e maua ai le loto malie o le tamaiti. Faamatala mai le mafuaaga ua e filifili ai lea nofoaga.

**PESE :** Iona Iona Iona

**A'OA'OGA:**

1. E puipui ma leoleo i tatou e le Atua.
2. Faalogo ma Usitai i le Atua.

## UA SOLA IONA I TASESA



\*\*\*\*\*

ASO SA:

26 MATI 2023

**MATAUPU:           UA USITAI LE MATAGI MA LE VAI IA IESU**

**SINI:**                 Ia malamalama tamaiti, le iuga o le tamaititi lē usitai.

**TUSI FAITAU:**       LUKA 8: 22-25

**FESOASOANI MO FAIAOGA:**

O le vai lea i Kalilaia, e oso faafuasei ai matagi malolosi ma afatia ai malaga i lea ituvai i le i si ituvai. Ae lē lilo i le vaai a Iesu afa tetele e tō-faata'uta'u i lea vaega, auā e mafai lava ona Ia vaoia. Peitai, ua faaoo mai le afa i le vaa, e lui ai lo latou ola fia fai ma soo o le talalelei. A o mea ia e faalologo i le siufofoga o le Alii.

Faimai na moe Iesu ma le toofilemu, ma mapu ane teisi sei fai sina koma, ae lafoai le ola i le Atua. Malaga ua alu mautinoa o faatasi ma le Atua, e lē popole i se mea, ae faalagolago i le Atua. Peitai ua lē o lea le ausoo; ae ua fefefe ma sa'i ia Iesu.

Tamaiti, aua le fefefe, ia ola matata'u ma faalogo i le Atua. Ave Iesu i lou vaa; pe vaai le vaa o Iesu, e te alu ai, ona mautinoa lea o lou saogalemu i luga o le vasa. Tamaiti, faamuamua Iesu ma tatalo i le Atua e manuia ai lou olaga.

**Uiga o Upu:**

- |                   |   |                    |
|-------------------|---|--------------------|
| i)      tuuvaan   | - | Malaga ese/alu ese |
| ii)     fano      | - | mafatiapagatia     |
| iii)    faatuatua | - | talitonu/faamoemoe |

**GALUEGA FAATINO:**

Tali mai i le “sa'o” po o le “sese”

1.    Na o Iesu na alu i le vaa
2.    Sa ala Iesu a'o agi le afā
3.    E le'i fefefe le au so'o ina ua agi le afā

**PESE:**               A i ai Iesu i lou vaa, ou te ata i le afā.  
Ata i le afā, ata i le afā.

**A'OA'OGA:**

1.    E laveai Iesu i taimi faigatā
2.    Aua le fefe, ae faatuatua i le Atua
3.    Tatalo i le Atua

**UA TAOFI E IESU LE MATAGI MA LE VAI**



---

MANATU TAIALA O APERILA:

E ALOFA MAI LE ATUA IA TE I TATOU

O le Atua lava ia o le Atua loto faamagalo, o le Atua e alofa. O le alofa o le Atua na ia aumaia ai lona Alo pele e maliu 28aim ma a'u ma i tatou uma.

**ASO SA:** **2 APERILA 2023 (ASO SA LAUPAMA)**

**MATAUPU:** **O LE MALAGA FAATUPU A IESU I IERUSALEMA**

**SINI:** Ia malamalama tamaiti, sa fa'aaloalo tagata ia Iesu i lana Malaga faatupu i Jerusalema.

**TUSI FAITAU:** Mareko11: 1-10.

**FESOASOANI MO FAIAOGA:**

O ai ua afio mai? O le Atua. Aisea? Ina ia faaoaina i tatou tamaiti faalogotatā ma le lē usitai, e ala i lona alofa tunoa. Tamaiti o le Aso Sa lenei ua tatou faamanatuina ai le malaga faa-tupu a Iesu i Jerusalema, lea foi tatou te ta'ua o le **ASO SA O LE LAUPAMA**.

O lea aso, na oo atu ai Iesu i aai o Petefake ma Petania, na ia aauina atu ai nisi ona so'o e toalua i le isi nuu latalata ane, e aumai le tamai asini o loo noatia ai. Fai mai o le asini e le'i tietie ai lava se tagata. Na fai atu foi Iesu iā i la'ua, a fai ane se tagata po o le a le mea ua la faia ai lea mea, ona la fai lea i ai, e mana'o i ai le Alii, ae toe faafrai vave mai. Na talia e lē ana le asini le feau a le Alii. Ua la ta'ita'i mai le asini iā Iesu, ona latou lafo lea o o latou ofu i ona luga, ona tietie ai lea o Iesu.

O le malaga faatupu e Paia ma Mamalu. Afai e pepese ma alalaga tagata, "Osana! Ia manuia le afio 28aim le suafa o le Alii, ua alagatatau lea. Afai foi latou te folaina le ala i o latou ofu faapea lala o laau, ua matuā tatau ma onomea. O le finagalo paia o le Atua i le soifua atoatoa e afio mai tatou te mafuta ma fiafia faatasi. E leai se isi mea e sili atu nai lo le soifua ma le ola o Iesu na ofoina mai ona o i tatou le fanau.

Ua malie le loto ma le agaga i le galuega sa faatinoina e le Alii, a o le faaeaea ma le faafetai a le tagata ina ua iloa mautinoa, o Iesu le Mesia ua Afio mai. Tamaiti, avea lenei Aso Sa Laupama tatou te manatua ai Iesu ma lona alofa laveai 28aim o i tatou le fanau.

**Uiga o Upu:**

- i) Noatia - nonoa
- ii) Osana - Faaola mai

**GALUEGA FAATINO:** Faatino faatasi e le vasega le tala.

O ē moomia i le faatinoga: Iesu, so'o e toalua, asini, tagata e ana le asini, motu o tagata..

**PESE:** Osana pepese tamaiti uma, tamaiti uma, tamaiti uma.

Osana pepese tamaiti uma ua Afio mai Iesu.

Ua latou fola laupama i le ala, laupama i le ala, laupama i le ala,

Ua latou fola laupama i le ala, ma latou alalaga.

Osana, Osana i le Alo Tavita, ia manuia le afio mai le suafa o le Alii,

O le Tupu ua afio mai, Osana, Osana i mea aupito i luga.

**A'OA'OGA:**

1. Iesu le tupu o tagata uma.
2. Ia fa'aaloalo i le Atua.

**UA MALAGA IESU I IERUSALEMA**



\*\*\*\*\*

**ASO SA:**

**09 APERILA 2023 (ASO SA O LE TOETU)**

**MATAUPU:**      **UA ASIASI TINĀ I LE TUUGAMAU**

**SINI:**                Ia malamalama tamaiti i le tāua o le alofa moni faatinā.

**TUSI FAITAU:**      Luka 24: 1-12

**FESOASOANI MO FAIAOGA:**

Ua oo i le uluai aso o le vaisapati, ia po o le vaveao lea o le Aso Sa. Na o ai fafine e toatolu e asi le tuugamau o Iesu. O Maria le Makatala, o Ioana faatasi ai ma Maria le tinā o Iakopo.

Ua latou ave foi o mea manogi ua latou saunia, e asi ai le tuugamau o Iesu. Fai mai la tamaiti ua faateia i latou, ina ua o latou o atu, ua fulieseina le maa nai le tuugamau. Ona latou ulu atu lea i totonu ma ua latou iloa ai ua leai se tino o Iesu. Ona latou popole ma fefefe i lenei mea ua tupu.

Peitai, ua tutu mai ia te i latou tagata e toalua ua oofu i ofu pupula. A ua latou fefe ma popole ae ma fai mai loa ia tagata ia te i latou, “Se a le mea toute saili ai le ua soifua i e ua oti? E le o iinei o ia, a ua tu .....

Ona toe foi loa lea ma latou faamatala atu lea tala fiafia ua latou maua, i le au so’o e toasefulu ma le toatasi, atoa ai ma latou uma.

Tamaiti, ese le ofoo fogia o le mea lea na tupu i lea aso a ea?

Ua tatou iloa ai foi ii, tiga lava ona oti Iesu ma ua tuu i le tuugamau, ae tau mulimuli ai pea le alofa o lona tina ma isi tina ia o loo ta’ua i tala. E faapena foi tatou tina tamaiti, po o le a lava lo tatou faalogogatata ma le lē usiusitai i le tele o taimi, ae iloa loa e lou tina ua e ma’i, e tuu uma mea la e manao e fai, ae sau tausi lou ma’i ma ave oe i le falema’i.

Ia manuia tele outou le fanau, i le feagai ai ma a’oa’oga o lenei vaiaso ua amatalia. O le toe upu mo outou le fanau, ia e iloa ma ia e malamalama, e alofa lou tinā ia te oe i taimi uma ma aso uma.

**Uiga o Upu:**

- i)      vaisapati      -      Mavae /uma le sapati
- ii)     fememeai      -      Popole/le mau manatu
- iii)    matatau      -      Fefefe

**GALUEGA FAATINO:**      **Paso**

F	T	G	F	Y	G	H	Y	G	F	U	K	O
Y	O	E	A	C	V	B	M	A	R	I	A	U
S	E	E	A	L	O	I	A	P	U	T	I	U
F	T	T	T	A	U	P	T	U	H	E	E	F
C	U	Y	O	U	H	K	A	H	P	W	F	E
Q	A	M	A	M	A	T	T	U	E	A	R	M
W	S	U	F	D	E	A	A	T	T	S	T	E
A	A	B	A	F	A	F	U	Y	E	M	G	M
S	S	N	I	G	V	U	H	R	R	N	H	E
L	A	M	A	H	E	U	G	G	U	B	Y	A
I	G	K	V	V	A	I	S	A	P	A	T	I
J	U	L	A	T	T	U	B	H	T	G	J	L
H	I	P	I	U	O	S	P	J	O	T	I	I

**Sue mai upu  
nei:**

- 1 Fememeai
- 2 Vaisapati
- 3 Matatau
- 4 Maria
- 5 Toetu
- 6 Peteru

**PESE:**

*Le taeao segisegi.*

**A'OA'OGA:**

1. Fai galuega lelei mo isi.
2. E faamaoni le alofa o le tinā.
3. Ave lou ola mo Iesu.

**UA ASIASI TINĀ I LE TUUGAMAU O IESU**



---

ASO SA:

16 APERILA 2023

**MATAUPU:**      **O LE MANAI MAI LE ATUA**

**SINI:**                Ia malamalama tamaiti, e faafogaina e le Atua o tatou manaoga.

**TUSI FAITAU:**      Esoto 16: 2-4

**FESOASOANI MO FAIAOGA:**

Tamaiti o le tala lea sa faitauina, o le lona sefulu lima lea o aso talu ona o ese mai le nuu o le Atua mai Aikupito.

O le mea ua tupu, ua fia aai nei le nuu atoa; ona latou muimui lea ma le fiafia ia Mose ma Arona, o i laua ia na totofi e le Atua e taitai le nuu e o i Kanana. O le fia aai la o le nuu na avea ma ala o lo latou toe fia fo'i ai i Aikupito. Fai mai o latou mafaufau, e ui e pologa i Aikupito ao la e ai ai fasipovi ma isi meaai lelei, nai lo o le mea ua tupu nei.

Peitai tamaiti, na silafia uma e le Atua manatu ma lagona ia o lona nuu. Le ala lea o le fetalai mai ai o le Atua ia Mose “o le a Ia faatotōina ifo le mea e ai mai le lagi ma latou, e o atu foi le nuu ma latou faaputuina, o le aso ma ana mea e tusa ai; ina ia ona tofotofoina ai ia te i latou.”

Ioe tamaiti, o le manuia na o le Atua ua faatotōina ifo mo lona nuu o Israelu. O meaai e aai ai lona nuu a o alu la latou faigamala.

O le a'oa'oga foi lea mo i tatou le fanau. ‘Aua lava nei i ai se taimi e tatou te faapea ane ai, ua le alofa mai le Atua ia te i tatou. E leai, o le Atua lava ia o le Atua e alofa pea ma alofa pea ia i tatou.

Ia manuia tele outou le fanau i a'oa'oga o lenei aso.

**Uiga o Upu:**

- i)      tufaaga          -      fasi povi
- ii)     faatotōina       -      foai mai / faapa'ū mai le lagi

**GALUEGA FAATINO:**      Faafetaui Upu

- |                     |   |                       |
|---------------------|---|-----------------------|
| 1.      Mose        | - | Tuu faatasi           |
| 2.      Tofotofoina | - | faitio                |
| 3.      Faatotōina  | - | taitai                |
| 4.      Faaputuina  | - | foai mai / tuuina ifo |
| 5.      Muimui      | - | faosoosoina           |

**PESE:**      E alofa fua

E alofa fua, alofa mutimuti vale

O le Alii i lana fanau x2

E faateletelegese, o lona toasa

Ae faatumauina o lona alofa

*(alu faalua le fuaiupu na, ona lava ai lea)*

**A'OA'OGA:**

1. E i ai pea manua o le Atua ia i tatou.
2. E tumau pea le alofa o le Atua
3. ‘Aua le ola muimui.

## **UA FAFAGAINA E LE ATUA I LE MANAI MAI LE LAGI**



**MATAUPU:**      **FAFAGAINA E IESU LE LIMAGAAFE O TAGATA**

**SINI:**                Ia malamalama le vasega e leai se mea e faigata i le Alii.

**TUSI FAITAU:**      Mataio 14: 15-21

**FESOASOANI MO FAIAOGA:**

O lea ua oo i le afiafi. O le taimi e malolo ai le Alii Faaola ma ona so'o mai le galuega talai. Ua o ane foi ona so'o ma fai atu ia te Ia, ina ia tuu atu o tagata e o e faatau ni a latou meaai. Peitai ua fetalai ane Iesu, "e le aoga ona latou o, a ia o latou avane ni mea e ai ma i latou"

Ona latou fai ane lea, "e leai ni a latou mea iinei, ua na o areto e limagafua ma i'a e lua lau."

Ona fetalai atu lea o Iesu ia te i latou, e avane ia te Ia, ma ia fai atu i le motu o tagata ia taooto i le mutia. A o Iesu ua tago o Ia i areto ma ia, ua Ia faafetai ona tofitofi lea ma avatu i ona so'o e faasoa atu i le motu o tagata. Ona aai ai lea o le motu o tagata ma ua o latou maoona, ua latou fu'e foi toe'aiga i ato ma tutumu ai ato e sefulu ma le lua.

Ioe tamaiti, ese le ofoofogia ma le silisili ese o mea e faia e Iesu Keriso. Ae mo tatou, ia o tatou talitonu ma le faatuatua e faia e Iesu Keriso vavega i lo tatou ola.

**Uiga o Upu ma Fuaitau:**

- |      |               |   |                                |
|------|---------------|---|--------------------------------|
| i)   | silafia       | - | iloa ma malamalama lelei i ai. |
| ii)  | motu o tagata | - | faapotopotoga o tagata         |
| iii) | limagafua     | - | lima areto                     |
| iv)  | lua lau       | - | lua ia.                        |

**GALUEGA FAATINO:**      **Faatumu avanoa**

Faatumu avanoa i upu nei, *aai, tuufua, limagafua, lau, tofitofi, vaaiga, vavega, taooto*

O le nofoaga *tuufua* na tupu ai lenei *vaaiga* O le *vavega* na faia e Iesu i areto e *limagafua* ma i'a e lua *lau*. Ua ia fetalai atu i le motu o tagata e *taooto*. Ona ia *tofitofi* lea o areto ma tufatufaina ai ma latou *aai* ai.

**PESE:**                O vavega, o vavega na faia e Iesu  
Le motu o tagata, le motu o tagata  
Taaoto ma taumamafa  
O ona so'o, o ona so'o sa latou aumaia  
Le tamaititi, le tamaititi  
Faafetai viia le Alii

(*Fati: O Iosefa, O Iosefa*)

**A'OA'OGA:**

1. Ia tatou talitonu ma faatuatua i le Atua
2. Ua faia e Iesu le vavega
3. Fafaga i ē o fia aai.

## **UA FAAFETAI IESU I LE ATUA ONA O ARETO E LIMA MA I'A E LUA**



\*\*\*\*\*

**MATAUPU: IOSEFA LE FAAMATALA MITI**

**SINI:** Ia malamalama tamaiti, e fesoasoani mai le Atua i o tatou mafaufau.

**TUSI FAITAU:** Kenese 41: 25-36

**FESOASOANI MO FAIAOGA:**

Tamaiti o le miti, o nisi ia o mafaufauga e tutupu pe momoe tatou i le po, ia mo se taimi foi o le aso.

O Iosefa la o lo o ta'ua i le tatou mataupu, o le atalii lea o Iakopo. O ia foi o se taulealea o lo o i ai le meaalofa lea o le faamatala pe faailoa le uiga loloto o miti. Lea la e i ai le miti a le tupu o Farao lea na fai.

Fai mai, ina ua ala a'e Farao i le isi taeao, ua lagona lona fefe ma le atuatuvala, ona o lana miti na fai. Ua ia aami foi taulāitu uma o Aikupito atoa ai ma tagata popoto. E o mai e faamatala le uiga o le miti a Farao. Peitai tamaiti; e leai ma se isi e mafai ona ia faamatalaina.

Le ala lea alu ane ai loa Iosefa ma faamatala ia Farao le uiga o lana miti. O se fiafiaga tele lea ia Farao ina ua ia malamalama lelei i lana miti na faia.

E iu i le faigata o le tulaga o le a oo i ai Aikupito e pei ona faailoa mai i lana miti; ao lona fiafia sili, ua mafai ona malamalama ai ona o Iosefa ma lona atamai e faamatala.

O se feau foi lea ua aoao mai mo i tatou le fanau. Po o le a lava mea faigata e tutupu i lo tatou ola. Ia 'aua lava nei galo, e tapena e le auala e faaeaina ai i tatou.

O Iosefa na agaleagaina e ona uso, ma o le ala foi lea o lona oo ai totonu o Aikupito. E ui i le faigata na feagai ma ia, ae na faaeaina e le Atua ma mafutaina o ia; ma avea ma faaola mo lona aiga i aso leaga.

**Uiga o Upu:**

- i) faalepo - o miti
- ii) oge - leai ni meaai atoa ai ma vai inu.
- iii) faaumatia - faaleagaina.
- iv) fano - feoti.

**GALUEGA FAATINO: Haka**

Miti!  
Hiiiiii!!  
O Iosefa, o le fai miti  
Na ia faamatala, Farao ma lana miti  
O pov'i ma saito, leaga ma mamae  
Faaleagaina e le matagi mai sasae.  
Faatusaina i le nuu o Aikupito  
(Feagai ma faigata) le amio piopio.  
Hiiiiii....

x2

**PESE:**

Ua faamatala e Iosefa  
Le miti a Farao  
O povi atoa ma saito  
O le nuu o Aikupito

Tali: Faaleaga ma mamae  
Matagi mai sasae  
O le faailoga lava lea  
O manuia ua tafea  
A o *leeee* e lototele  
E manuia pe - a oo mai le oge  
O le uiga le na,  
O ōna mafaufauga x2.

*Fati: I have a dream*

**A'OA'OGA:**

1. Fa'aaoga taleni mai le Atua
2. O miti o isi ia meaalofa mai le Atua
3. Ia lototele e faamatala le mea moni.

## O LE MITI A FARAO NA FAAMATALAINA E IOSEFA



10:20-10:29

20 Behold there cometh a year of great plenty throughout all the land of Egypt: 21 And there shall come after that year seven years of famine; and all the plenty in the land of Egypt shall endure no less. 22 And they shall say that we do them in the land the house of God having told us of their plenty before it came.

10:20-29

## **MANATU TAIALA O ME : IA FAAMAONI I LE ATUA**

O le ola faamaoni ma tumau i le Atua, e faapena foi ona faamaoni ma fesoasoani mai le Atua ia i tatou. E le gata o taimi tatou te feagai ai ma faafitauli ae faapea foi taimi uma o lo tatou ola. O le ola faamaoni foi i le Atua, e faatuputeleina ai e le Atua manuia i lo tatou ola.

**ASO SA:** **7 ME 2023**

**MATAUPU:** **UA FAASAOINA SATARAKA, MESAKO, APETENIKO**

**SINI:** Ia malamalama tamaiti o le ola tumau i le Atua, e laveaiina mai ai i faafitauli.

**TUSI FAITAU:** Tanielu 3: 20-27

### **FESOASOANI MO FAIAOGA:**

O le tala lea sa tatou faitauina tamaiti, o le tala i le lafaina o Sataraka, Mesako ma Apeteniko i totolu o le ogaumu aasa. O le faatonuga na faia e le tupu o Nepukanesa, ina ia faao ai le otu i taulelea nei e toatolu; ona o le lē ifo i le tupua auro na faia e Nepukanesa.

A o Sataraka, Mesako ma Apeteniko, o ni tagata e talitonu tele ma faatuatua i le Atua soifua. Le ala lea o le lē ifo ai i le tupua auro na faia e le tupu. O le faatonuga la a le tupu, ina ia lafo i totolu o le ogaumu ma mu ai i latou.

Peitai tamaiti e le tuulafoaiina e le Atua ona tagata faatuatua ma talitonu ia te Ia. Le ala lea o le auai ai o le Atua ia i latou a o i ai i totolu o le ogaumu aasa ma faasaoina ai i latou mai le afi . O se vaaiga ofoofogia tele lea na vaaia e Nepukanesa, auā na lafaina i latou i totolu o toatolu, ae faateia le tupu ina ua vaai atu ua toafa i latou. A o le Atua lea ua faatasi ma ona tagata talitonu tumau ia e Ia.

### **Uiga o Upu:**

- i) fusifusia - tuu faatasi, nonoa faatasi
- ii) ofu talaloa - ofu e gata mai tapuvae
- iii) fano - faaumatia, feoti

**GALUEGA FAATINO:** **Taliga Fesili**

1. O ai tama e toatolu o lo o ta'ua i le tala?

*Tali: Sataraka, Mesako ma Apeteniko*

2. O le a le faaiuga na faia e Nepukanesa?

*Tali: Ia susunuina i le ogaumu aasa.*

3. O ai le igoa o le tupu o lo o ta'ua i le tala?

*Tali: Nepukanesa*

**PESE:** Amazing Grace

## A'OA'OGA:

1. E faatasi le Atua ma ona tagata
2. 'Aua le fefevale gofie
3. Lototele e faailoa le Atua

## O SATARAKA, MESAKO MA APETENIKO I TOTONU O LE AFI



\*\*\*\*\*

**ASO SA:** **14 ME 2023 (Aso Sa o Tinā)**

**MATAUPU:** **UA AGALELEI LE FAFINE SAREFATA**

**SINI:** Ia malamalama tamaiti e tausia pea e le Atua ona tagata.

**TUSI FAITAU:** 1 Tupu 17: 8-16

**FESOASOANI MO FAIAOGA:**

O lea ua fetalai atu le Atua ia Elia, e alu i le nuu o Sarefata, o le aai lea o Saitonu. O lo o i ai le fafine ua oti lana tane, o ia lea na te fafaga ia te ia.

Ona alu loa lea o Elia. Ua oo foi o ia i le faitotoa o le aai, ona iloa lea e ia o le fafine ua oti lana tane, o loo fai fafie. Ona fai atu lea o ia, “Sei e au mai i lou lima se fasi areto ma’u.” Ona tu lea o le fafine ma fai atu ia te ia, “O lo o soifua le Alii le Atua, e leai se potoi areto ia te au; ua na o le luutaga o falaoa i le kate, ma sina suauu itiiti i le fagu, ou te tumu ma maua aai ai ona ma oti lea.”

Peitai tamaiti, fai mai Elia, “aua e te fefe; alu ia, ina e faia le mea na e fai mai ai; a e muamua ona e fai se potoi areto itiiti ma’u, ona mulia’i lea ma ouldua ma lau tama. Auā ua fetalai mai le Alii lou Atua, E le uma le kate falaoa, e le faaitiitia le suauu i le fagu, seia oo i le aso e foaiina mai ai e le Alii le ua i le laueleele.

Ona faapena lea ona faia e le fafine ma ua faamanuiaina ai e le Atua lo la aiga.

Tamaiti o le tatou mataupu le na. Ia o tatou mautinoa, o le ola foai ma le loto talitonu ma le faamaoni i le Atua. E tatou te lē matitiva ai se mea e tasi. Ae atili fau ma soloi ai le tamaoaiga sasaa mai o le Atua.

**Uiga o Upu:**

- i) tane - toalua o le fafine
- ii) ma’u - ma a’u
- iii) kate falaoa - mea e palu ai falaoa/fagu e teu ai falaoa

**GALUEGA FAATINO:** Faatulagana

Toe faatulaga mai upu o lo o i lalo i le tulaga sao.

Faataitaiga: mata – tama

1. liae - \_\_\_\_\_ (*Elia*)
2. teka - \_\_\_\_\_ (*Kate*)
3. uusuā - \_\_\_\_\_ (*suauu*)
4. uga - \_\_\_\_\_ (*fagu*)
5. toare - \_\_\_\_\_ (*areto*)

**PESE:**

Auauna e a le Atua  
Ua afea i ta'ua  
Faatoga mo sina meaai  
Ua lagona le vaivai

Toe, si luutaga  
Mo a'u nei, ma si au tama  
A uma loa, o le a ma oti  
E ititi e lava foi

**A'OA'OGA:**

1. E fafaga tatou e le Atua.
2. Alofa i auauna a le Atua
3. Foai ma le loto talitonu.

## O LE FAFINE SAREFATA MA LANA TAMA, MA ELIA



**ASO SA:** 28 ME 2023

**MATAUPU:** UA SAVALI IESU I LUGA O LE VAI

**SINI:** Ia malamalama tamaiti, e mafaia e Iesu ona faia soo se mea.

**TUSI FAITAU:** Mareko 6: 49-51

**FESOASOANI MO FAIAOGA:**

Tamaiti o le tala sa tatou faiatuna. O le tasi nei o vaega ofoofogia o le galuega tala'i a Iesu Keriso. A o le tala i le mea na tupu i luga o le sami ao aga atu soo o Iesu i le isi itu vai. E lei faatasi Iesu ma ona so'o i le taimi lea. A o le molimau a le tala sa faiatuna, ua vaaia e le au so'o Iesu o lo o savali mai luga o le vai; ona latou fefefe ai lea ma atuatuvala.

E le gata i lea, ua latou manatu ane foi, o ia o se aitu. Peitai na fetalai atu Iesu ia te i latou, "Ia outou loto tetele; o a'u lenei, aua toe te matatau." Ona maliu ae lea o ia i luga o le vaa ia te i latou, ona malū ai lea o le matagi; ona matuā segia ai lea o latou mauli, ma ua o latou ofo tele ai.

Tamaiti o le tatou mataupu lena. E mafaia e Iesu ona faailoa mai lona mamalu ma lona silisili ese i so o se auala. E pei ona Ia faaali i le au so'o i luga o le sami, ae manatu ane ai le au soo o Ia o se aitu. Ia o tatou iloa foi ma malamalama, e i ai taimi e tofotofoina ai i tatou e lo tatou Alii, i mea e lei tupu muamua i lo tatou ola.

**Uiga o Upu:**

- i) Segia - mou ese / alu ese
- ii) Uio - oi
- iii) Atuatuvala - popole/fefefe

**GALUEGA FAATINO:** Tusiga ata

Tusi mai ata o lo o faaigoaina i lalo. *Manaia ae tapena e lau susuga le faiaoga ni A4 e fa'aaoga e tamaiti.*

Iesu i luga o le vai \_\_\_\_\_

Vaa \_\_\_\_\_

**PESE:**

Fiafia lo'u loto tau atu tagata o!  
Iesu Keriso le tupu x3  
O Ia o le tupu o tupu } x2

Get all exited  
Go tell everybody that  
Jesus Christ is Kingx3  
Jesus Christ is still the King of Kings

## A'OA'OGA:

1. E silisili ese Iesu Keriso
2. E leai se mea e faigata i le Alii
3. Tumau ma talitonu ia Iesu

## UA SAVALI IESU I LUGA O LE VAI



\*\*\*\*\*

## **MANATU TAIALA O IUNI :      O LE ATUA LE TAIALA SILI**

O le savaliga a le tagata Kerisiano, e le o se savaliga faigofie. O se faigamala ui i faigata ma faafitauli o le ola nei. E taumate foi, e i ai lava le kerisiano e faavaivai ma pa'ū ai i faaosooosoga. A o le avea ai o Atua ma taiala sili i la tatou folauga, e manuia ai mea uma tatou te savalia. Auā o Ia o le Atua alofa, na te puipui ma leoleo lo tatou ola mai mailei a le fili.

**ASO SA:**                  **4 IUNI 2023**

**MATAUPU:**                **UA FAIA E ARONA LE TAMAI POVI AURO MO ISARAELOU**

**SINI:**                     Ia malamalama tamaiti, o le manao e tupu ai le maasiasi.

**TUSI FAITAU:**           Esoto 32: 1 – 6

### **FESOASOANI MO FAIAOGA:**

Tamaiti o le tala lea na tatou faitauina, o le mea sese na faia e Arona ina ua tuai mai Mose sa alu i luga o le mauga. O le tuai ane o Mose na tupu ai manatu o tagata Isaraelu ina ia fausia se atua mo i latou. O le ala lea o le latou faatauanauna Arona ia faia lea tulaga. Ona fai atu lea o Arona ia te i latou, ia motusi ese o mama auro o i taliga o a latou avā, ma o latou atalii, ma o latou afafine ona avatu lea ia te ia e na te faia ai se atua auro mo i latou.

Ona faapena lea ona faia e tagata o le nuu o Isaraelu. Ua latou avane ia Arona o mama auro, o tautaliga atoa ai ma asoa auro, ina ia vave ona faia ai se atua mo i latou. Ua faia foi e Arona o le fata faitaulaga i ona luma; ona alaga atu lea o Arona ma fai atu. “O le a faia le tausamiga i le Alii a taeao.”

Ae i le taeao, ua na ala usu le nuu ua fai taulaga mu, ma latou avatua taulaga faafetai, ona aai lea ma inu, ona tutu ai lea i luga ma sisiva.

Tamaiti ua aoao mai le tala lenei mo i tatou. Ia 'aua lava le avea faamanuiaga ua tatou maua ma mea e galo ai le alofa o le Atua i ai tatou. Le nuu o Isaraelu na faasaolotoina e le Atua mai le ola pologa i Aikupito, a o lea ua galo le alofa o le Atua, ma ua mananao e fai se isi atua e muamua atu ia te i latou. Ia o tatou manatua foi tamaiti, o le taimi tatou te o ese ai ma le Atua, o le taimi foi na e oo mai ai puapuaga ia te i tatou.

Manuia outou le fanau.

### **Uiga o Upu:**

- |      |            |   |             |
|------|------------|---|-------------|
| i)   | Faatuatuai | - | tuai        |
| ii)  | Motusi     | - | momotu      |
| iii) | Gaosi      | - | faia/fausia |
| iv)  | Tausamiga  | - | aai         |
| v)   | Alaga      | - | valaau      |

**GALUEGA FAATINO:**      Faamatala ata

Lau susuga i le faiaoga, a silasila ane i ata na o lo o avatu i la tatou tusi, e black & White. Ae tatalo atu ma le agaga vaivai, e tapena ae e lau susuga ni ata lanu, ona fai lea i tamaiti e faamatala atu ata na ua tapenaina e lau susuga.

Ata Muamua – (Povi Auro) - \_\_\_\_\_

Ata Lona Lua – (Arona) - \_\_\_\_\_

**PESE:**

O a'u oute aumau i le mea nei  
Ma le olaga agasala uma nei  
Ae ina ua ou maua Iesu  
Ua ou mauaina lona filemu

Tali: E moni e mulimuli  
Mai ia te au  
Le agalelei ma le alofa  
I aso uma o lou ola  
E moni e mulimuli  
Mai ia te au  
Le agalelei ma le alofa  
I aso uma o lou ola  
Ae ou te nofo i le fale o le Alii e faavavau  
Ma te talisua foi o ia ma au  
E moni e mulimuli mai ia te au  
Ia aso uma, i aso uma o lo'u ola.

**A'OA'OGA:**

1. Ia 'aua nei galo le Atua
2. 'Aua le faalogo i faatonuga sese
3. Ia faautauta lelei.

## UA FAIA E ARONA LE TAMAI POVI AURO



\*\*\*\*\*

**ASO SA:**           **11 IUNI 2023**

**MATAUPU:**       **O LĒ NA I AI TALENI E LUA**

**SINI:**              Ia malamalama tamaiti, o le faamaoni e faaeaina ai.

**TUSI FAITAU:**     Mataio 25: 22-23

**FESOASOANI MO FAIAOGA:**

O taleni tamaiti, o meaalofa po o agavaa ua foa'iina mai e le Atua ia i tatou. E tatou te fa'aaogaina lelei ma le tatau, e toe auauna ai ia te Ia. Ae le gata i lea, a ia faamaoni foi tatou i lona fa'aaogaina.

*Faataitaiga:*    *ta piano*  
                        *taalo lakapi*  
                        *pese*  
                        *taalo soccer*

O le tala lea sa faitauina, o le tali lea o le galuega sa faatinoina e le auauna, na tuuina i ai e lona matai taleni e lua. Ua sau o ia i lona matai ma fai atu ia te Ia. "Le Alii e, na e tuuina mai ia te au taleni e lua; faauta, ua ou maua ai isi taleni e lua."

O lona uiga tamaiti, e le faapea na nofonofo le auauna lea na tuuina i ai taleni e lua. Na ona ia maua lava o nei taleni, alu loa ma galue ai ma le faamaoni. O le manao lava o lenei auauna ina ia i ai se faasiliga i le taimi e valaau mai ai lona matai. Ae le gata i lea, ia iloa ai foi e lona matai, sa ia auauna ma le faamaoni e faaaoga ma le tatau le avanoa ua ia maua.

O le taimi lava na iloa ai e le matai lea tala lelei. Ona ia fai atu loa lea i lana auauna, lea sa tuu i ai taleni e lua. "..... le auauna lelei e, ma le faamaoni, ua e faamaoni i mea itiiti, ou te tofia oe e pule i mea e tele; ina ulufale mai ia i le fiafia o lou alii." Ia ona ulufale loa lea o lenei auauna ma le fiafia.

Ia o le tatou mataupu lena tamaiti, ua aoao mai foi le tāua o lenei mataupu mo i tatou le fanau. O a taleni ua tatou maua, ua fa'aaoga ma le tatau, ae ia sili ai ona viia le Atua. Ia manatua foi e tatou, a tatou le faaaogaina taleni ua tatou maua, e toe aveese e le Atua ae tuu i le tamaititi la e fa'aaogaina ma le tatau avanoa. O ou tiute faatamaititi i totonu o lou aiga, ia faia ma le faamaoni, auā o lo o silasila mai le Atua. A e alu le aoga, o lau taleni o lou filiga ma tinou ia maua le poto.

Ia manuia tele outou le fanau i a'oa'oga o lenei vaiaso.

**Uiga o Upu:**

- i)      taleni           -      meaalofa / agavaa
- ii)     ulufale        -      sau i totonu / alu i totonu
- iii)    auauna        -      o le tagata galue

**GALUEGA FAATINO:**   Faailoa Taleni

Talosagaina lau susuga le faiaoga e tapena ni pepa A4 ma tufa i tamaiti. Ona tuu lea o le avanoa i le tamaititi e tusi mai ai lava e le tamaititi le taleni o loo mafaufau i ai i le lumana.

### Faataitaiga:

- Ou te fia ta piano.
- Ou te fia faifeau
- Ou te faletua.
- Ou te tama pese
- Ou te teine pese

### **PESE:**

1. E lima taleni na tuuina mai ou te galue ai  
Manao le Atua ina ia toe faafoi mai  
Ia ou galue ma le faamaoni  
Ina ia ou maua ai o se taui  
Le numera lima  
Ina ulufale maia
2. E lua taleni na tuuina mai ou te galue ai  
Manao le Atua ina ia toe faafoi mai  
Ia ou galue ma le faamaoni  
Ina ia ou maua ai o se taui  
Le numera lua  
Tuu atu i le Atua
3. E tasi taleni na tuuina mai ou te galue ai  
Manao le Atua ina ia toe faafoi mai  
Ia ou galue ma le faamaoni  
Ina ia ou maua ai o se taui  
Le numera tasi  
Alu ia i le afi

### **A'OA'OGA:**

1. Galue ma le faamaoni
2. Fa'aaoga meaalofa a le Atua
3. 'Aua le paie

## O ATA O TALENI E MAFAI ONA MAUA E FANAU



\*\*\*\*\*

**ASO SA:** **18 IUNI 2023**

**MATAUPU:** **UA LAFOINA TANIELU I LE LUA O LEONA**

**SINI:** Ia malamalama le vasega, o togafiti leaga a tagata na mafua ai ona lafo Tanielu i le lua o leona.

**TUSI FAITAU:** Tanielu 6: 1 – 24 (Faiaoga)  
Tanielu 6: 16 & 17 (Vasega)

**FESOASOANI MO FAIAOGA:**

O Tanielu o le sa Iuta, ae na filifilia o ia e le tupu o Tariu, e fai ma alii silisili o le malo o Metai ma Peresia. O lona atamai tele, na manatu ai le tupu, o le a avea o ia e fai ma pule o le malo atoa. Peitai, na avea lea tofiga o Tanielu, ma mafuaaga na le fiafia ai nisi o e mautofi o le malo o alii silisili, o alii sili o faipule ma pule o nuu. Na o latou manatu ai, ia fai se togafiti ia latou molia ai Tanielu i luma o le tupu. O lea na o latou faia ai se tulafono, ma avatu i le tupu ina ia ona faamaonia. O lea tulafono, ua latou faasa ai so o se tasi o le malo, ona tapuai atu i se isi lava atua, ae tau lava o Tariu le tupu o Metai ma Peresia. A i ai se tagata e maua o tapuai i se isi atua, ona lafo lea i le lua o leona.

O Tanielu o le tagata e faatuatua tele i lona Atua, o le mafuaaga foi lena o lona tatalo faatolu i le aso, i lona fale, ona o lona faamaoni i lona Atua. A ua avea lea masani a Tanielu e tatalo i lona Atua, ma ala na molia ai o ia, i luma o le tupu. Na taumafai Tariu le tupu e faasao Tanielu, ona e leai sona sese, peitai, ua naunau lava i latou na molia o ia, ina ia faataunuina le tulafono ia lafo i le lua o leona.

Na faatonuina e le tupu tagata ia lafo Tanielu i le lua o leona. A o i tatou te iloa ai le malosi ma le silisili ese o le Atua o Tanielu, aua na Ia auina mai lona agelu, e pupuni gutu o leona, ae faasao ia Tanielu. Na faasaoina Tanielu, a ua faatonu e Tariu le tupu, ina ia lafoaina i le lua o leona, i latou uma na molia Tanielu ma faia lenei togafiti leaga, faatasi ai ma o latou auaiga. Na faaumatia i latou uma i le lua o leona, ona o la latou amiolega.

Le fanau e, e leai se mea e faigata i le Atua. Po o a lava faafitali o lenei ola, i lau aoga, o lou aiga, o lau Ekalesia, po o faalavelave foi e tutupu i totonu o lou nuu, e lave'ai lava i tatou e lo tatou Atua, pe a tatou talitonu ma le faamaoni ia te Ia.

**Uiga o Upu:**

- |      |                   |   |                          |
|------|-------------------|---|--------------------------|
| i)   | faatoga           | - | aioi, tatalo             |
| ii)  | vavao             | - | sa, tulafono             |
| iii) | tālaina           | - | e le mafai ona tatalaina |
| iv)  | faamauina         | - | sainiaina, pasiaina      |
| v)   | faamaufaailogaina | - | fai ma faailoga          |

**GALUEGA FAATINO:** **FAAFETAUIGA**

Faafetaui upu nei i o latou uiga

- |    |                   |   |               |
|----|-------------------|---|---------------|
| 1. | auauna e le aunoa | - | tapuni / loka |
| 2. | faamaufaailoga    | - | faaumatia     |

3.	faataalise	-	togi / tulei
4.	punitia	-	tautua i aso uma ma taimi uma
5.	lafo	-	faatopetope
6.	lamupala	-	fai ma faailoga

**PESE:**      Ia pei o Tanielu  
 O lena na loto mau  
 Aua na inoino o ia  
 I amioga faapaupau

E ui ina lafaina  
 I le lua o leona  
 Ae na faasaoina e le agelu  
 Mai le Atuā

(fati: “Silasila ia i Tina,” mai ia Uili Tavita)

### A’OA’OGA:

1. Sa faamaoni Tanielu i le Atua
2. E laveai e le Atua ona tagata.
3. Aua tatou te agaleaga i isi tagata

## O TANIELU I LE LUA O LEONA



\*\*\*\*\*

**ASO SA:** **25 IUNI 2023**

**MATAUPU:** **O LE TAGATA POTO MA LE TAGATA VALEA**

**SINI:** Ia malamalama le vasega, o le tagata e faalogo ma faia le finagalo o le Atua, o le tagata poto lena, a o lē e le faalogo ma le faia o le tagata valea lena.

**TUSI FAITAU:** Mataio 7: 24 – 27

**FESOASOANI MO FAIAOGA:**

O nisi nei o upu o le lauga a Iesu e pei ona amata mai i le mataupu e 5, ua ia apoapoi ai i le motu o tagata faatasi ai ma ona so'o, e ao ona latou faalogo ma faia mea uma ua Ia fetalai atu ai. Ua faatusa ai e le Alii le tagata, e faalogo i ana a'oa'oga ma ola ai, o le tagata poto lena. A o le e lē faalogo i ana upu ma lē ola ai foi, ua faatusaina i le tagata valea.

Ua aumai ai foi e Iesu se feau taua tele mo i latou uma o e na faalogologo ia te Ia, e eseese taunuuga o le tagata poto ma le tagata valea. O le tagata poto, ua faatusaina e Iesu i le tagata na te fau lona fale i luga o le papa, e le mafai e uaga, o tafega ma matagi ona talepeina, aua ua mausali lona faavae i luga o le papa. A o le tagata valea, ua faatusaina i le tagata na te fau lona fale i luga o le oneone, ma e faaleaga gofie e uaga, tafega ma matagi ma e faigofie foi ona talepeina i lalo.

Fanau, o le feau ua fia momoli mai mo i tatou, o le tamaitiiti e tumau ma faamoemoe ma faalogo i a'oa'oga a Iesu, o le tamaitiiti manuia lena, po o lava faigata o le ola e oo mai, e le mafai ona ia faavaivai ai. Aua o lo o faavae lona ola ia Iesu o le Papa, e mausali ma faamaoni lona alofa.

Ae o le tamaitiiti e le faalogo ma lē usitai i a'oa'oga a Iesu, o ona matua ma lona aiga, e aafia gofie lava i faafitauli ma faaososoga o le ola. Tamaiti, tumau ia Iesu o Ia o le Papa o le Ola tatou te manuia ai.

**GALUEGA FAATINO:** **UPU UIGA TUTUSA**

Ta'u mai nisi upu e tutusa o latou uiga ma upu nei

1.      uaga                –                (timu)
2.      matagi             –                (savili)
3.      tafega             –                (lologa/vaitafe)
4.      malepe            –                (faaleagaina)

**PESE:** Le tamaloa poto na fau lona fale i luga o le papa \*3  
Ona to mai lea o le timu  
Ua to mai le timu  x3  
Ua sau foi le tafe  x3  
Ona tu ai lea o le fale.

Le tamaloa valea na fau lona fale i le oneone x3  
Ona to mai lea o le timu  
Ua to mai le timu  x3  
Ua sau foi le tafe  x3  
Ona pau ai lea o le fale

#### A'OA'OGA:

1. Faavae lou ola ia Iesu o le Papa
2. Faalogo ma usitai i le Atua.
3. E taua le poto.

O LE TAGATA POTO MA LE TAGATA VALEA



**The Wise Man and the Foolish Man**

\*\*\*\*\*

## **MANATU TAIALA O IULAI: IA MATAALA I TAIMI UMA**

E taua le mataala i taimi uma, auā o le tele o taimi e luitauina ai i tatou i faafitauli o le ola, aemaise o faaosoosoga a le fili ma le tiapolo e taumafai e lepeti mafutaga i aiga, nuu ma le Ekalesia. O lea e tatau ai lava ona tatou mataala ma faamoemoe mea uma i le Atua e ala i le Agaga Paia, ina ia mafai ona tatou tetee atu i le tele o faaosoosoga ma faalavelave e ono tutupu i lo tatou ola.

**ASO SA:** **2 IULAI 2023**

**MATAUPU:** **UA AGALELEI IOSEFA I ONA USO**

**SINI:** Ia malamalama tamaiti, ua agalelei Iosefa i ona uso, auā ua ia tausi ia te i latou ma faamagalo i lo latou amioleaga sa fai ia te ia.

**TUSI FAITAU:** Kenese 50: 15 – 21

### **FESOASOANI MO FAIAOGA:**

Ua toe foi Iosefa ma ona uso i Aikupito, ina ua uma ona tanu o Iakopo lo latou tama i Kanana, ona manatu ai lea o le au uso, a nei a agaleaga atu Iosefa ia i latou ma taui atu i la latou mea leaga sa fai ia te ia. Aua na o latou lafo ia te ia i le lua ma faatau atu i tagata Mitiana. Peita'i, ua le faapena Iosefa, e lei fia manatua e Iosefa le amioleaga a ona uso ia te ia, aua o ia o se tagata alofa ma loto faamagalo.

E ui a o le togafiti leaga a uso o Iosefa, na mafua ai ona ia oo i Aikupito, ae peitai sa lotolotoi ai lava ma le alofa tau mulimuli o le Atua. E lei tuulafoa'iina e le Atua Iosefa, ae na ia filifilia e fai ma alii sili o Aikupito e ala mai i tofiga a Farao. O fuafuaga alualu mamao ia a le Atua mo Iosefa, ina ia fai o ia ma faaola mo ona uso, ma tagata o lona aiga ma lona nuu, o e ua aumau i Aikupito.

Fanau, e ese le lelei o Iosefa, aua ua ia agalelei i ona uso. Ua ia tausi ia te i latou i Aikupito, ma faamagalo i lo latou amioleaga sa fai ia te ia. E lei fia manatua e Iosefa le amioleaga a ona uso, aua o ia o se tagata alofa. O Iosefa o le tagata ua ola i ala o le Atua ma savavali faatasi ma le Atua i aso uma o lona ola. E taua lo tatou agalelei i so o se tagata aua e alofagia mai ai tatou e le Atua.

### **Uiga o Upu:**

- i) faalotoloto – ita / faalii
- ii) faamagalo – aveese ni mea sese ma faagalo

### **GALUEGA FAATINO: TALIGA FESILI**

#### Tali fesili nei:-

1. O ai foi matua o Iosefa?

Tali: O Iakopo ma Rasela.

2. Ina ua maliu Iakopo, o le a se lagona na oo i uso o Iosefa?

Tali: Sa fefefe le au uso, ina nei taui e Iosefa se leaga ia i latou.

3. O le a se lagona na oo ia Iosefa ina ua feiloi ma ona uso?

Tali: Na lagona e Iosefa lona loto alofa, ona ia agalelei ai lea i ona uso ma faamagalo ia te i latou.

4. O ai foi le uso sa sili ona pele ia Iosefa?

Tali: O Peniamina.

**PESE:**      O Iosefa na filifilia  
                  E le Atua e fai ma faaola  
                  Na ia laveai lona aiga.  
                  Mai le pologa.

Ua alofa i nai ona uso  
Ua loto faamagalo  
Na ia laveai lona aiga  
Mai le pologa

(Fati: Fiafia lo'u loto i le manogi o le puataunofo)


### A'OA'OGA:

1. Ia agalelei i so o se tagata.

2. Aua le taui ma sui.

3. Ia tatou maua le loto fefaamagaloa'i.

## UA AGALELEI IOSEFA I ONA USO



\*\*\*\*\*

**ASO SA:** **9 IULAI 2023**

**MATAUPU:** **IA LOTO FAAMAGALO**

**SINI:** Ia malamalama le vasega, e finagalo le Atua, ia tatou maua le loto faamagalo.

**TUSI FAITAU:** Mataio 6: 14 – 15

**FESOASOANI MO FAIOAGA:**

O le tasi lea a'oa'oga taua sa faamamafa e Iesu i lana lauga i luga o le mauga, "LOTO FAAMAGALO". Ua a'oa'o ai Iesu i ona so'o ma le motu o tagata, o e na faalogologo ia te Ia, e finagalo le Atua ia loto fefaamagalo'i tagata uma.

O le loto faamagalo, na te aveeseina tiga o le ola, e na te tausia foi le filemu pe afai e i ai ni faafitauli e tutupu i le va o tagata. O le loto faamagalo foi, e fealofani ai tagata ma galulue faatasi ai foi tagata ma maua le loto fesoasoani o le isi i le tasi.

Fanau, e taua lo tatou loto fefaamagalo'i. afai ua inoino mai se tasi po o se isi tamaitiiti ia te oe, ia faamagalo i ai. Auā o le finagalo moni lena o le Atua, a o tatou faamagalo atu i isi tagata i mea leaga ua latou faia mai, e faapena foi ona faagaloina e le Atua a tatou agasala.

Ia maua le loto faamagalo i totonu o aiga, o le aoga, o le nuu, le Ekalesia, ona manuia lava lea o i tatou uma i le alofa ma le agalelei o le Atua.

**GALUEGA FAATINO:** FAASA'OGA

Toe tusi faasa'o mai upu nei:

- |    |                |   |                  |
|----|----------------|---|------------------|
| 1. | tolo galomafaa | - | (loto faamagalo) |
| 2. | gaula          | - | (lauga)          |
| 3. | gamau          | - | (mauga)          |
| 4. | galofina       | - | (finagalo)       |
| 5. | muto o gatata  | - | (motu o tagata)  |

**PESE:**  
Loto faamagalo  
Ia aua nei galo  
Loto faamagalo  
Ma toaga e tatalo  
Loto faamagalo  
Ma ia loto maulalo  
Loto faamagalo  
Ia faia i so o se aso.

(fati: Ua ou filifili e mulimuli ia Iesu))

## A'OA'OGA:

1. Ia tatou maua le loto fefaamagaloa'i.
2. Aua nei uma le aso o e ita pea.
3. Ia tatou maua le fealofani.

## UA A'OA'O IESU I LE MOTU O TAGATA I LE LOTO FAAMAGALO



\*\*\*\*\*

**ASO SA:** **16 IULAI 2023**

**MATAUPU:** **O LE TAUTOGA A IEFATA I LE ATUA**

**SINI:** Ia malamalama tamaiti, so o se tautoga lava e fai, e ao ona usitaia ma mulimulitai i ai.

**TUSI FAITAU:** Faamasino 11: 29 – 31

**FESOASOANI MO FAIAOGA:**

O le upu “tautoga” e sau mai le upu tauto. O lona uiga, o se tuugatala e faia e ni tagata se toalua pe sili atu foi, ma e ao foi ona faataunuina ia tuugatala ma mulimulitai i ai. E le o se tautoga le fai o ni tuugatala ae le taunuu. O Iefata o le Kiliata, o le tasi aai o Isaraelu. O lona tamā foi e igoa ia Kiliata. E i ai ona uso, ma o i latou foi ia na tulia esea Iefata mai le latou aiga, aua o ia o le tama a le fafine ese. Ua alu ese Iefata mai le latou aiga, ona sii taua mai lea o le fanauga a Amoni ia Isaraelu. Ona o atu lea o toeaiina o Kiliata e aami ia Iefata, auā latou te le mafai ona tau ma sa Amoni, sei vagana Iefata.

Ua foi mai Iefata i Kiliata, e sauni e tau ma le fanauga a Amoni. A ua ia muamua ona saili i le Atua mo se fesoasoani mo ia ma tagata uma o Isaraelu. Ona ia faia ai lea o lana tautoga i lona Atua, o lē muamua ulufafo mai i lona fale e faafetaia’i ia te ia pe a foi manuia mai le taua ma Amoni, o ia lena e ofoina atu mo le Alii, e auauna ai i lona olaga atoa

Tamaiti, o le tautoga a Iefata i lona Atua, o le tasi lea filifiliga taua ua ia faia, ina ia lavea’iina mai ai lona nuu mai lima o le fanauga a Amoni. O le tautoga a Iefata, o lona faalagolago lea ma faamoemoe ma lona loto atoa i le Atua, e fesoasoani mo ia. A o se tautoga foi e tatau ona usitaia ma mulimuli i ai, aua o lo o i aao o le Atua le taunuuga o mea uma e oo lava i le faatoilaloina o le fili.

E taua tamaiti lo tatou faamoemoe i lo tatou Atua, e fesoasoani mai ia i tatou, e mafai ai ona tatou faatoilaloina le fili ma ana mailei. Manuia tele outou le fanau.

**GALUEGA FAATINO:** PASO

Saili mai upu nei: **ALII, IEFATA, AMONI, KILIATA, FAITOTOA, ULUFAFO**

A	A	T	A	U	T	O	T
O	L	I	O	L	I	F	A
T	I	E	F	A	T	A	I
O	I	M	O	E	S	F	A
T	U	I	A	L	A	U	L
I	D	S	M	N	M	L	A
A	E	I	O	T	O	U	F
F	U	E	N	O	A	T	O
K	I	L	I	A	T	A	U

**PESE:** Ua fai le tautoga a le tama o Iefata  
O ia o le toa mai le nuu o Kiliata  
O le Atua alofa ma faamaoni  
Ua faatoilalo ai Amoni


O lē muamua e faafetaia'i a'u  
Lo'u Atua e, o ia lena ou te avatu  
E fai ma a'u taulaga i ou luma  
Viia lau afio i aso uma

(fati: Pese ma Viiga #34, “Tatou te olioli”)

**A'OA'OGA:**

1. E faamaoni le alofa o le Atua.
2. Ia faataunu a tatou tautoga.
3. Tatou faamoemoe ma faalagolago i le Atua.

## UA TAUTO IEFATA I LE ATUA



\*\*\*\*\*

**ASO SA:**           **23 IULAI 2023**

**MATAUPU:**       **UA TULIA I FAFO LE NA I AI LE TALENI E TASI**

**SINI:**              Ia malamalama le fanau, e iu leaga le tagata e le faamaoni e atia'e taleni mai le Atua.

**TUSI FAITAU:**     Mataio 25: 24 – 30

### **FESOASOANI MO FAIAOGA:**

O le faataoto lea a Iesu, na ia faamatalaina ai le eseesege o le taunuuga o le tagata faamaoni e i'u manuia, ma le malaia e oo i ai le tagata le faamaoni.

E toatolu auauna na vaevaeina i ai e le matai ana taleni, ona o le a alu malaga. O le auauna sa i ai taleni e lima, o lē na i ai taleni e lua, ma le isi sa i ai le taleni e tasi.

Ua alu ese atu le matai, a o lona naunautaiga, ia galulue ma le faamaoni ana auauna e atia'e ma fa'aaoga tatau taleni, ina ia maua mai ai nisi taleni, po o se faasiliga foi.

Ua foi mai le matai, ua manuia le sa i ai taleni e lima, auua ua maua isi taleni e lima, e faapena foi i le sa i ai taleni e lua, ua faaopoopoima isi taleni e lua. Peitai, o le auauna sa i ai le taleni e tasi, e leai sana faasiliga auua ua ia tanu lana taleni i le eleele.

Le fanau e, na i'u manuia auauna sa i ai taleni e lima ma le lua, auua sa faamanuia i ai le matai. O lo la faamaoni e atia'e ma fa'aaoga lelei a la taleni, ua la maua ai foi i si faasiliga, ma ua faaulufale i laua e le matai i ona manuia e tele.

A o le auauna sa le faamaoni ma paie e galue le taleni e tasi sa ia te ia, ua tulia o ia e le matai i fafo i le mea o i ai le pouliuli ma le malaia.

Fanau e, e taua le faamaoni e alu i le aoga ma usitai i ou matua ma so o se tasi, auua e te maua ai manuia e tele mai le Atua. E manuia ai oe ma lou lumanai, manuia ou matua, le aiga, le nuu aemaise le Ekalesia. Aua tatou te pei o le auauna, paie ma le le faamaoni sa i ai le taleni e tasi, auua e lei manuia lona taunuuga, na o le malaia.

### **Uiga o Upu:**

- |                        |   |  |
|------------------------|---|--|
| i)      selesele       | – | ua fua mai / o ni mea ua toe maua mai  |
| ii)     faataapeapeina | – | faasalalau solo, tufatufaina atu       |
| iii)    taleni         | – | agavaaa, valaauiina eseese mai le Atua |

### **GALUEGA FAATINO: TALIGA FESILI**

Tali mai fesili nei, e tusa ma lou malamalamaaga i le tala sa faamatalaina.

1.      O fea sa ave i ai e le auauna le faamaoni le taleni e tasi sa ia te ia?
2.      O le a le taunuuga o le auauna leaga sa i ai le taleni e tasi?
3.      E i ai se faamoemoe o le matai i taleni nei ua tuuina atu i ana auauna?

4. O le a le taui namaua e auauna sa i ai taleni e lima ma le lua?

**PESE:** Pese a le Aoga Aso Sa “E lima taleni na tuuina mai ou te galueina”

**A’OA’OGA:**

1. Tatou faamaoni e faatino so o se galuega.
2. E le fiafia Iesu i le ola le faamaoni.
3. E finagalo le Atua ia tatou manuia.

## UA NATIA LE TALENI E TASI



\*\*\*\*\*

**ASO SA:**           **30 IULAI 2023**

**MATAUPU:**       **UA FAAMALOLOINA NAAMANU LE SURIA**

**SINI:**              Ia malamalama le vasega, ua na o le mana o le Atua, e mafai ai ona faamaloloina ma'i.

**TUSI FAITAU:**     2 Tupu 5: 8 – 14

### **FESOASOANI MO FAIAOGA:**

Na alu le sailiga togafiti a Naamanu, le alii e pule i 'au a le tupu o Suria, i Isaraelu. Aua ua ia faalogo, o lo o ia Isaraelu le perofeta o Elisaia le tagata o le Atua, o ia na te mafai ona faamalolo i ma'i.

Ua aioi Naamanu ia Elisaia mo se fesoasoani, ona auina mai ai lea e le perofeta o lana auauna e fai ia Naamanu, e alu e taele ma tofu faafit u le vaitafe o Ioritana, e faamaloloina ai lona ma'i lepela.

E lei fiafia Naamanu i lea faatonuga a Elisaia aua ua ia manatu, e sili atu Apana ma Farapa o vaitafe o Tamaseko na i lo Ioritana ma vai uma o Isaraelu. Peitai, e ui a i sona le fiafia ae na alu lava aua na augani ana auauna ia te ia, ia faia le mea na faatonuina mai e Elisaia le tagata o le Atua. Ona alu ai lea o Naamanu ua fufui faafit lona tino i le vai o Ioritana, ona manuia ai lea o ia ma toe maua lona malosi, aua ua faamamaina lona tino lepela.

Ioe le fanau, ua na o le mana o le Atua na ala atu i lana perofeta o Elisaia, na mafai ai ona faamaloloina le lepela o Naamanu. Ua iloa ai foi e lenei alii e pule i au o Naamanu, o lo o ia Isaraelu le perofeta, o ia o lo o fai ma sootaga o le Atua ma lona nuu. E leai lava se isi mea o i lenei lalolagi tatou te sulufai i ai mo se fesoasoani, ua na o le Atua tatou te saili i ai. O a ni faafitauli fanau o feagai ma outou i aoga ma aiga, e manaomia lo tatou tatalo ma aioi i le Atua, e maua mai ai le fesoasoani mo i tatou.

### **Uiga o Upu ma Fuaitau:**

- i)      Apana ma Farapa      –      o igoa ia o vaitafe o loo i Tamaseko
- ii)     Tamaseko              –      o le aai o Suria
- iii)    fufui le tino i le vai   –      taele / tofu i le vai

### **GALUEGA FAATINO: UIGA FAAFEAGAI**

Tusi mai uiga faafeagai o upu nei

1.      saei                    -      (su'i)
2.      fufui                  -      (alu ese)
3.      faalatalata           -      (taumamao)
4.      tagata o le Atua    -      (tiapolo)
5.      lepela                  -      (faamamaina)
6.      talo lona lima       -      (aveese lona lima)

**PESE:** O Naamanu le lepela  
Ua alu tau tevateva  
Ia Elisara o le perofeta  
Sei e alofagia  
O a'u nei o le Suria  
Lo'u ma'i sei e aveese ia <sup>x2</sup>

(fati: O le alili aliao)

**A'OA'OGA:**

1. O Iesu le Foma'i Sili.
2. Talitonu ma le faamaoni i le mana o le Atua.
3. E le faailoga tagata le Atua.

## UA MALOLO LE MA'I O NAAMANU



\*\*\*\*\*

## **MANATU TAIALA O AOKUSO: TUMAU I LE ATUA**

O le tumau i le Atua, o le taiala sili lea e manuia ai fanau. O le faamoemoe, ia matua a'oa'oina fanau ina ia tumau i le Atua i taimi uma o le ola, leaga ua le o toe faigofie nei aso i le tele o suiga fou ua ofi mai, ma ua tele ai le mau faafitaui e tutupu. O lona uiga, a lelei ona tapu'eina le ola faaleagaga o fanau i le Atua ma lana Talalelei, ona le mafai lava lea e ia faafitaui o le ola ona manumalo ia i latou.

**ASO SA:** **6 AOKUSO 2023**

**MATAUPU:** **UA FAAFITI FAATOLU PETERU IA IESU**

**SINI:** Ia malamalama tamaiti, o le ola faafiti o Peteru, o le faailoga o lona le tumau i le Alii.

**TUSI FAITAU:** Ioane 18: 25 – 27

### **FESOASOANI MO FAIAOGA:**

E faatolu ona faafiti Peteru ia Iesu. O le faafiti muamua, o lo o i le (fuaiupu 17), ao isi faafitiga e lua, o lo o taua mai i le tatou Tusi Faitau mo le asō.

Na faafiti muamua i le auauna teine na leoleo faitotoa i le fale na faamasino ai Iesu, ona sosoo ai lea ma lona pepelo i le motu o tagata na tuuaia o ia e ala iā Iesu, ma le faafitiga mulimuli, o le tagata o le aiga o lē na tipiese a Peteru le taliga. O le faafitiga lona tolu lea a Peteru, na vivini ai loa moa, ona manatua ai lea e Peteru le fetalaiga a Iesu, “E le i vivini moa seia e faafiti faatolu mai ia te a'u.

E lei tumau Peteru ia Iesu, auā ua ia faafitia faatolu o Ia. Sa savavali faatasi ma Iesu, sa vaavaai ma faalogologo i wavega na faia e Iesu, ae na te lei taliaina, auā ua ia faafiti i lona Alii. Ua manaomia e Iesu se so'o e lagolagosua ma fesoasoani ia te Ia i taimi o ona puapuaga, ae paga lea, ua le tumau Peteru ia te Ia. Ua galo i lenei so'o le alofa o le Alii, na ia faaola ai ia te ia ma tagata e toatele. Ua tauaso lona ola faaleagaga ina ua tupu tele faafitaui o le ola, ma ua galo ia te ia, e leai se mea e faigata i lona Alii.

Tamaiti, soia tatou te ola femoumoua'i e pei o Peteru. Na fiafia lava ia Iesu i taimi sa sologa lelei ai la latou mafutaga, ae na feagai loa Iesu ma puapuaga, sola ese loa, faafiti loa. E le iu lelei le tagata e le tumau i le Atua, aua a lafoa'i e le Atua lena tagata, ona malaia lava lea o lona olaga. Tumau i le Atua i aso uma ma taimi uma, tatou te maua ai ana faamanuaiga ma se lumanaifiafia ma le filemu.

### **Uiga o Upu:**

- i)      mumulu            -      faamafanafana pe afai ua malulu.
- ii)     faafiti            -      pepelo, lafoa'i, le amanaia

### **GALUEGA FAATINO: FAATINOGA**

Faatinoga: E sili pe a faatino e tamaiti le tala, e fesoasoani e tau faamalamalama atili ai mo latou, ina ia latou iloa tonu le uiga o la tatou mataupu o lenei Aso Sa.

Faatonutonu pea e a outou susuga i Faiaoga le fanau i le faatinoina o le tala  
E manaia foi ae faatino muamua e Faiaoga le tala

**PESE:** Pe tumau lou taula i taimi o afā  
A'o gasolo ao faatupu malā  
O peau o le sami ua tau falō  
Po o ua motusia lou taula po o ua e malo


Tali: Lo'u nei taula ia tutumau  
Ia mausali i taimi o peau  
Tumau i le papa lea ua mautū  
Faamaoni i le alofa o Iesu.

(Pese: Au a Tama - Boys Brigade)

**A'OA'OGA:**

1. E iu leaga le tagata e le tumau i le Atua.
2. Aua tatou te pei o Peteru le ola faafiti.
3. Alofa ia Iesu i lou olaga atoa.

## UA FAAFITI PETERU IA IESU



\*\*\*\*\*

**ASO SA:**           **13 AOKUSO 2023**

**MATAUPU:**       **E TUMAU PEA IOSUA I LE ATUA**  
**(ASO SA O TAMA)**

**SINI:**              Ia malamalama le vasega, e manuia le tagata e tumau i le Atua

**TUSI FAITAU:**     Iosua 24: 14 – 16

### **FESOOASOANI MO FAIAOGA:**

O lea ua faamafanafana ma faamalosiau Iosua i le nuu o le Atua, ina ua toeaina lava o ia, ma ua lata foi ina oti. Ua ia faamamafa ai ia Israelu, e ao ona latou ola matata'u ma auauna i le Atua ma le loto sa'o ma le faamaoni. Ia lafoai ma tuueseina atua faapaupau na auauna i ai o latrou tama, a ia faasaga tasi e auauna ma tumau i le Atua soifua, o le na o si feagaiga ma o latou augatama, o Aperaamo, Isaako ma Iakopo.

O le Atua na ia faasaolotoina mai o latou tamā mai Aikupito, na Ia faasaoina foi le nuu mai taua ma o latou fili ma aveina a'e i latou i le nuu ua folafolaina o Kanana, e fai ma o latou tofi. O le ala foi lena e tatau ai ia Israelu ona tumau i le Atua, ma auauna ia te Ia ma le amiontonu.

E manatu Iosua, ia tumau Israelu i lo latou Atua ina ia o latou maua pea ana faamanuiaga. O le taimi lava e o ese ai ma le Atua, o le taimi foi lena e feagai ai ma faafitauli ma puapuaga o le ola.

Tumau i le Atua ma auauna pea ia te Ia, ona le mavae lava lea o ana faamanuiaga mo tatou le fanau. E faapefeea ona e faatinoina lou tumau i le Atua fanau?

Toaga i le lotu ma le aoga Aso Sa, alu i aufaipese, faalogo ma usitai i ou matua ma so o se tagata, faamaoni i au meaaoga, alofa i so o se tasi, atoa ai ma nisi uiga lelei e tatau ona faatinoina, ona maua lea e outou ma tatou uma le mafanafana o le alofa pa'i mai o le Atua e ala i ana faamanuiaga.

Faamanuia le Atua ia te outou fanau.

### **Uiga o Upu:**

- i)       matatau        –       ava, faalogo ma usitai
- ii)      loto sao        –       loto lelei, loto mamā

### **GALUEGA FAATINO: SAO PO O LE SESE**

#### **Tali i le Sao po o le Sese**

1.       Sa fai Iosua ma taitai o Israelu.

Tali:    Sa'o

2.       Na apoapoai Iosua ia Israelu, ina ia o latou lafoa'i i le Atua.

Tali;    Sese

3. O upu nei a Mose .. “a’o a’u nei ma lo’u aiga, matou te auauna i le Alii.

Tali: Sese

4. Na faamalosiau Iosua i lona nuu, ina ia o latou tumau ma auauna i le Atua.

Tali: Sa’o

5. E ese le faamaoni o le Atua i lona nuu o Isaraelu, e ui ina latou agasala pea.

Tali: Sa’o

**PESE:** O upu faamalosiau a Iosua

Isaraelu tumau i le Atua

O Ia na lavea’i outou mai anamua

Na Ia mulimuli o Ia foi na muamua

Faataitai uma ia Iosua

O le na tumau i le Atua..Amene

(fati: O la’u poloaiga lenei ia te outou)

**A’OA’OGA:**

1. Ia pei o Iosua, o le na tumau i le Atua.

2. Filifili i le ola ae le o le malaia.

3. E suamalie le ola auauna i le Atua.

## O IOSUA I LUMA O LE FANAUGA A ISARAELO



\*\*\*\*\*

**ASO SA:** **20 AOKUSO 2023**

**MATAUPU:** **O LE VINE MONI MA ONA LA**

**SINI:** Ia malamalama le vasega, o Iesu o le vine moni a'o tatou o ona la

**TUSI FAITAU:** Ioane 15: 1 – 10 (Faiaoga)  
Ioane 15: 5 – 7 (Vasega)

**FESOASOANI MO FAIAOGA:**

O le vine moni ma ona la, o le isi lea faataoto laulioa a Iesu, ua Ia a'oa'o ai ona so'o, i le taua o le avea ma so'o moni o Keriso e ala lea i le tumau ma le faamaoni i a'oa'oga a le Talalelei e uiga i le malo o le Atua.

Ua faamanatu ai e le Alii i ona so'o, o la uma o lo o pipii i le vine e le fua mai, e aveeseina e Ia ma susunuina, a o la uma o lo o pipii i le vine e fua mai, e teuteu e le Alii ina ia fua atili mai.

O lo o aumai ai e Iesu o Ia o le vine ma le tagata ua faatusaina i le la, o le tagata e savali ma le faamaoni, e tausi ma teu mau afioga a le Alii, o le tagata lena e fiafia mai ai le Atua (galue vine), e faapelepele e le Atua, e tausi ma faamanuia i ai le Atua. A o le tagata e fua mai fua leaga, e le tumau i afioga a le Alii, na te lafoai i a'oa'oga a Iesu, ma le faia le amiontu a le Atua, o ia lena e tausalaina ma inosia e le Atua, ma e lafoa'i foi e le Atua i le mea o i ai le malaia.

Ioe le fanau, e le lelei le taunuuga o le tagata e le savali ma lē tumau i le amiontu a le Atua aua e le fiafia ai le Atua, e na te le maua foi faamanuiaga a le Atua. Ae a tumau i le Atua ma fai le amio sa'o, talitonu ma faamaoni i le alofa o le Atua, ona manuia lea o a outou aoga, manuia aiga ma Ia avatu i tatou i ona manuia e faavavau

**GALUEGA FAATINO:** **FAAFETAUI UPU**

Faafetaui upu i o latou uiga sao.

1.	aveese	-	faatoga
2.	faamamaina	-	e fua faalausosoo
3.	faapotopoto	-	lafoai
4.	poloaiga	-	faapaiaina
5.	fua mai atili	-	tuu faatasi
6.	ole	-	tulafono

**PESE:** O Iesu o le vine moni  
Ao lalā i tatou  
Oi tatou ao Iesu o le Lokou  
Na afio Iesu i le lagi  
Ae tuua o lenei lalolagi  
Ma le poloaiga "Ia outou fealofani"

(fati: Tiamaa)

## A'OA'OGA:

1. O tatou o auauna galulue a le Atua.
2. Ia fai tatou ma fanau e fiafia ai le Alii
3. E manuia ma alofagia le tagata amiotonu.

## O IESU LE VINE MONI



\*\*\*\*\*

**ASO SA:** **27 AOKUSO 2023**

**MATAUPU:** **UA MANA’O AAPO I LE TOVINE O NAPOTA**

**SINI:** Ia malamalama le vasega, o le agasala le mana’o fua i mea a le isi tagata.

**TUSI FAITAU:** 1 Tupu 21: 1 – 10

**FESOASOANI MO FAIAOGA:**

Talofa tamaiti, o le tatou mataupu i lenei taeao; Ua mana’o Aapo i le tovine a Napota. O Aapo, o ia lea o le tupu o Samaria. O lona uiga, o ia o le tagata mauoa. E leai se mea e tasi e mativa ai o ia. O fale tetele, o tupe, ma e toatele foi tagata e auauna ia te ia. A o Napota, ua na o lona tovine lava na tuuina i ai e lona tamā, e tausi ai lona aiga. O le tovine, o se togalaau tele lava e pei o maumaga talo ma togafai i nei aso i Samoa. O le tovine foi lea o Napota, e tu latalata ane i le maota o le tupu lea o Aapo.

Ua matagofie i le vaai a le tupu ma ua oso ai lona mana’o i le tovine. Na tauanau e Aapo ia Napota. Peitai, na musu Napota ona na o le pau lea o lona tamaoaiga e tua i ai lona aiga. Na faanoanoa tele le tupu ma ua iloa e Iesepela lona toalua. Na mafaufau ai loa le masiofo i se togafiti e toe maua ai le fiafia o lona alii le tupu. O lea na ia faia ai loa le togafiti leaga e fasiotia ai Napota ae fai mo laua ma Aapo le tovine.

Tamaiti, ua a’oa’o mai foi lenei tala ia i tatou. Ia aua nei o tatou manana’o fua i mea ua maua e isi tagata auā tatou te agasala ai. Aua foi nei o tatou faia ni togafiti leaga e faaleaga ai isi o tatou uso a tagata, auā e le fiafia mai ai le Atua ia te i tatou ma o’o mai ai lona toasa.

**GALUEGA FAATINO:** Taliga Fesili

Tali fesili nei mai le tatou tala sa faamatalaina.

1. O ai Aapo?

Tali: O le tupu o Samaria.

2. O ai le igoa o le toalua o Aapo?

Tali: O Iesepela.

3. O ai e ana le tovine na mana’o ai Aapo?

Tali: O Napota le Iesereelu.

4. Na faapefea ona maua e Aapo ma Iesepela le tovine o Napota?

Tali: Leai, o le togafiti leaga na laua faia.

**PESE:** O Aapo, o Aapo, o le tupu  
Na mana’o le tovine o Napota  
Iesepela, Iesepela le fafine  
Amio leaga, na mafua ai le agasala

Le toasa o le Atua, Aleluia  
Ua oo mai le tagata agasala  
Sola ese, sola ese mai le leaga  
Tatou te maua ai le faaolataga.

(fati: Tulei ese, tulei ese)

#### A'OA'OGA:

1. Aua le manao fua i mea a le lua te tuaoi, tatou te agasala ai.
2. Aua le fai togafiti leaga e faaleagaina ai nisi tagata.

#### UA MANAO AAPO I LE TOVINE A NAPOTA



\*\*\*\*\*

## **MANATU TAIALA O SETEMA MA OKETOPA: FAALAGOLAGO I LE ATUA.**

O le soifuaga o lo o outou soifua ma ola ai. E le o se savaliga e faigofie. Tatou te fetaiai ma fita ma faigata i le tele o tauiviga o lenei ola. Ua na o le Atua lava tatou te manumalo ai pe a tatou faalagolago ia te Ia ma le loto atoa.

**ASO SA:**           **3 SETEMA 2023 (ASO SA TALA LELEI)**

**MATAUPU:**       **UA FA'AALI IESU I LONA AUSO'O**

**SINI:**              Ia malamalama le vasega, o le toetu mai o Iesu, o le Tala Lelei lea mo i tatou uma.

**TUSI FAITAU:**    Luka 24: 36 – 43

### **FESOASOANI MO FAIAOGA:**

Tamaiti, o le a se mea taua o lea ua tatou faamanatuina i le Aso Sa lenei. Ia e sao lelei, o le Aso Sa lenei tatou te faamanatuina ai le taunu mai o le Tala Lelei ia Iesu Keriso lo tatou Alii Faaola i Samoa. O le tatou mataupu la i lenei taeao, Ua fa'aali Iesu i lona auso'o.

Fai mai le tala tamaiti, ina ua mavae le maliu ma le toetu mai o Iesu lo tatou Alii Faaola. Na matua fefefe lava le auso'o ma popole auā ua aveese Iesu sa fai mo latou taitai. Na tapunipuni uma faitotoa o le fale ma nonofo ai e le feoai nei iloa mai i latou e tagata Iutaia. Na faateia i latou ina ua tu mai Iesu i o latou luma. Ua fetalai atu i ona so'o, vaavaai mai i o'u lima ma o'u vae na tutu'i i fafo ma tagotago mai ia te Ia. O Ia lava lea na fasia, na maliu, ma ua toetu manumalo mai. O le Tala Lelei lea ia outou tala'i atu i tagata.

O se a'oa'oga foi lea mo i tatou le fanau, o le Tala Lelei ia Iesu. O le faaolataga mo tatou uma, e ala i lona maliu ma lona toetu manumalo mai le oti ma le tuugamau. Ia tatou faailoa ma tala'i atu e ala i lo tatou faia o amio lelei. Ia tatou ola ma savavali i ana a'oa'oga ua aumaia mo i tatou.

### **Uiga o Upu:**

- |      |            |   |              |
|------|------------|---|--------------|
| i)   | matatau    | - | fefe, palaii |
| ii)  | atuatuvale | - | popole       |
| iii) | olioli     | - | fiafia       |
| iv)  | fetalai    | - | tautala      |

**GALUEGA FAATINO:**    Matega Tupua

Faailoa mai tagata nei e uiga i o latou faamatalaga o lo o taua i lalo, mai le tusi faitau.

1.     Ia outou vaavaai mai i o'u lima ma o'u vae, auā o a'u lava lenei. O ai la a'u?  
Tali: O Iesu

2.     Sa matou fefefe ma matatau, ua matou atuatuvale foi ma masalosalo. O ai la matou?  
Tali: O outou o le auso'o.

**PESE:** O Iesu lena na afutoto  
I le fanua o Ketesemane i le po  
Ae sau ia ta o, ia Iesu e mapu ai ma malolo  
O Iesu ua toe soifua, mo tamaiti ma tagata matutua  
Ae sau ia ta o, ia Iesu e mapu ai ma malolo.

**A'OA'OGA:**

1. Tala'i atu le Tala Lelei ia Iesu
2. Ia tatou faia le amio lelei.
3. Ia fai tatou ma so'o o Iesu.

**UA FA'AALI IESU I ONA SO'O**



\*\*\*\*\*

**ASO SA:** **10 SETEMA 2023**

**MATAUPU:** **UA FAALAGOLAGO ELIA I LE ATUA**

**SINI:** Ia malamalama le vasega, na tali le Atua i le valaau a Elia.

**TUSI FAITAU:** 1 Tupu 18: 36 – 39

**FESOASOANI MO FAIAOGA:**

O i tatou le fanau, tatou te falagolago lava i o tatou matua i mea tatou te manana'o ai. E faataunu foi e matua mea uma ina ia tatou maua le fiafia. E faapea foi le finagalo o le Atua mo i tatou, e pei ona faia e Elia lana auauna.

O Elia, o le perofeta po o le auauna lea a le Atua. Na te faailoa ia Israuelu le finagalo o le Atua pe a fetalai mai le Atua ia te ia.

O le taimi lea tamaiti, ua matua agasala Israuelu i luma o le Atua, ona ua latou ifo ma tapuai i le tupua lea o Pa'ala. Ua le fiafia po ua faanoanoa le perofeta o Elia. Na tonu ai i lona manatu, o le a fai ni a latou taulaga ma tagata o Israuelu e faailoa ai po o ai le Atua moni.

O tu'utu'uga nei na fai e Elia e tapena ai mea uma e fai ai le taulaga. O fafie, o le fata faitaulaga, o le pov'i, ae aua nei avea i ai se afi. Ia latou valaau ia Pa'ala pe na te aumaia se afi e mu ai le latou taulaga. O le a faapea foi ia te ia ona valaau i le Atua e aumai ai le afi, o le Atua moni lea.

Fai mai ua fiu tagata e pepese ma alaga ia Paala ae lei tali mai ma aumaia se afi. O lea ua faatalatalata atu ai loa Elia ma valaau i le Atua i upu ia sa tatou faitauina mai le tusi faitau. Ua ofo tagata ina ua pau ifo le afi mai le Atua ma mu ai le taulaga a Elia. Na faapauufao ai lea o le nuu ma faapea ane, "O le Alii, o le Atua Ia."

Tamaiti, o se a'oa'oga foi lea mo i tatou. O a mea faigata, e fesoasoani mai lava le Atua ia i tatou. Aua nei o tatou ifo i ni tupua aua e le mafai ona tali mai i ai tatou. Ua na o le Atua soifua lava e toatasi tatou te faalagolago i ai, tatou te manumalo ai i so o se tauiviga lava e feagai ma i tatou.

**Upu ma Uiga**

- i) perofeta - auauna a le Atua, faifeau
- ii) faafogaga - faalogo, tali mai
- iii) mitiia - matutu, mimiti

**GALUEGA FAATINO:** Toe faatulaga mai upu nei i le upu sa'o

1. Taferope - (Perofeta)
2. Alie - (Elia)
3. Aatu - (Atua)
4. Alapa - (Paala)
5. Nauaua - (auauna)


**PESE:** O le Atua silisili ese  
Malosi ofoofogia  
E leai se mea e le mafai  
Ona Ia faia ha! ha!

Na Ia faia o atu mauga  
Na Ia faia o vaitafe  
O ona foliga na vaiaia  
I le lalolagi ha! ha!

**A'OA'OGA:**

1. Aua le ifo i tupua.
2. Faalagolago i le Atua tatou te manumalo ai.
3. E fesoasoani mai lava Atua ia i tatou.

## O LE TAULAGA A ELIA LE PEROFETA



\*\*\*\*\*

**ASO SA:** 17 SETEMA 2023

**MATAUPU:** UA SAVALI LE PIPILI

**SINI:** Ia malamalama le vasega o le suafa o Iesu Keriso na savali ai le pipili.

**TUSI FAITAU:** Galuega 3: 1 – 10 (mo le Faiaoga)  
Galuega 3: 4 – 6 (mo le Vasega)

### **FESOASOANI MO FAIAOGA:**

Talofa tamaiti, o le tatou mataupu i lenei taeao; “Ua savali le pipili.” O le pipili tamaiti, o le tagata ua le mafai ona savali ona ua le mafai ona faagaiioi ona vae. E le mafai ona alu i se isi nofoaga e manao i ai, seiloga e fesoasoani ai nisi pe fa’aaoga se nofoa faataavalevale (wheelchair) e pei ona i ai nei aso.

O le tala sa tatou faitauina mai le Tusi Paia, o le tala i le meaalofa a Peteru ma Ioane o so’o o Iesu, na mafua ai ona savali le pipili. Fai mai, ua oo i le tasi aso, na o ane ai Peteru ma Ioane i le malumalu e tatalo, ae faafeiloai ane i laua e le pipili o lo o nofo o ia i le faitotoa o le malumalu e igoa i le Matagofie, ma faatoga i tagata e ulufale atu i le malumalu mo se meaalofa mo ia. Fai mai na pulatoa i ai Peteru ina ua faatoga atu le pipili ia te i laua ma Ioane mo se meaalofa ma fai atu, “Vaai mai ia ia te ia i maua.” Ua naunau atu foi le pipili ia te i laua mo se meaalofa. A ua toe fai atu i ai Peteru, “E leai sa’u ario po o sa’u auro; a o le mea ua ia te a’u, ou te avatu lea ia te oe, o le suafa o Iesu Keriso o le Nasareta, ou te fai atu ai, ina savali ia.”

Ua tago atu Peteru i lona lima taumatau ma faatu i luga le pipili, ona malolosi ai lea o ona vae. Fai mai, ua oso i luga ma tu le pipili, ma ua savali foi. Ua latou ulufale atu i le malumalu faatasi ma Peteru ma Ioane. Ua savali ma oso, ma vivii i le Atua, le sa pipili. Ua taufaiofo uma foi tagata sa i totonu o le malumalu.

Ioe tamaiti, e le o se mana o Peteru ma Ioane na savali ai le pipili. O le mana o Iesu Keriso na savali ai le pipili. O le a’oa’oga fou lea mo i tatou le fanau. O a mea tatou te mananao i ai, ia tatou ole atu i le Atua e ala atu i le suafa o Iesu Keriso, ona foaiina lea mo i tatou i lona alofa tunoa. Ia tatou maua foi le loto foai mo e o lo o manaomia la tatou fesoasoani.

### **Uiga o Upu:**

- |      |          |   |               |
|------|----------|---|---------------|
| i)   | faatoga  | - | tauanau, aisi |
| ii)  | malumalu | - | falesa        |
| iii) | pulatoa  | - | pupula sa’o   |

### **GALUEGA FAATINO:** Taliga Fesili

Tali fesili nei mai le Tusi Faitau ma le tala sa faamatalaina

1. Aisea na o ai Peteru ma Ioane i le malumalu?

Tali: Na o e tatalo i le malumalu.

2. O le a le galuega a le pipili o lo o fai i le faitotoa o le malumalu?

Tali: Faatoga i tagata mo se meaalofa/aisi I tagata mo se meaalofa.

3. O le a le mea alofa a Peteru na ave mo le pipili?

Tali: O le suafa o Iesu Keriso le Nasareta, ma fai atu i ai ina savali ia.

**PESE:** Savali ma oso  
Ma vivii i le Atua } x 2  
I le suafa o Iesu  
Le Nasareta tulai ma savali.

#### A'OA'OGA:

1. E faia e Iesu mea lelei mo i tatou.

2. Ia maua le loto foai.

3. Alofa i e mamai.

### O PETERU MA IOANE I LUMA O LE MALUMALU



\*\*\*\*\*

**ASO SA:** **24 SETEMA 2023**

**MATAUPU:** **UA VALAAU LE ATUA IA MOSE**

**SINI:** Ia malamalama le vasega i le taua o le ola usiusitai.

**TUSI FAITAU:** Esoto 3: 1 – 10 (mo le faiaoga)  
Esoto 3: 9 – 10 (mo le vasega)

### **FESOASOANI MO FAIAOGA:**

Tamaiti, O ai na ta le papa? Ua iloa uma foi e tatou le tali a; Ioe, o Mose lea na taina le papa. O Mose foi lea o le a fai ai le tatou mataupu i lenei aso.

Fai mai a o i ai Isaraelu i Aikupito. Sa matua iloga lo latou pologa, ona o galuega mamafa ua tuuina ia te i latou. O lea sa finagalo ai le Atua ina ia aveese mai lona nuu o Isaraelu i le pologa i Aikupito, ae faasaoloto. A o le taimi lea ua alu ese mai Mose mai Aikupito e o atu i le nuu lea o Mitiana.

O lea na finagalo ai le Atua e tofia Mose na te taitaiina mai lona nuu mai Aikupito e o atu i le nuu o Kanana. O lea na Ia valaaau ai ia Mose i le mauga o Horepa, a o fai ai Mose ma leoleo mamoe i mamoe a Ietero le tama o lona toalua, mai totonu o le laau talatala, o lo o mu ai le afi ae le faaumatia. Ou te auina atu oe ia Farao ma e aumaia lo'u nuu o le fanauga a Isaraelu mai Aikupito.

Tamaiti, na usitai lava Mose i le Atua ma lona finagalo, ina ia alu e aumai lona nuu mai Aikupito. O se a'oa'oga taua foi lea mo i tatou le fanau. E tofu lava le tagata ma lona valaauiina mai le Atua; e pei o tatou matua lea ua auala mai ai faamanuiaiga a le Atua, pe afai tatou te maua le ola faalogo ma usiusitai ia te i latou. E pei ona fai mai le tulafono e lima, “Ia e ava i lou tamā ma lou tinā, ina ia faalevlevaina ai ou aso i le nuu o le a foa'iina mai e le Alii lou Atua ia te oe.”

### **Uiga o Upu:**

- i) ositaulaga - faifeau, auauna a le Atua.
- ii) Horepa - mauga o le Atua
- iii) fa'aali - faailoa
- iv) faaumatia - pe, faaleagaina
- v) Ietero - tama o le ava/toalua o Mose

**GALUEGA FAATINO:** Fesootaiga o Upu ma Uiga

Faafesootai upu nei i o latou uiga e pei ona aumai i le tala.

1. ositaulaga - mate, faaleagaina
2. Horepa - tama o le toalua o Mose
3. Ietero - nuu o Ietero
4. Mitiana - faifeau, auauna a le Atua
5. faaumatia - mauga o le Atua

**PESE:** Faalogo ma usitai

## A'OA'OGA:

1. Ia faalogo ma usitai i matua e manuia ai.
2. Aua le ola faalogogata

## UA VALAAU LE ATUA IA MOSE



\*\*\*\*\*

**ASO SA:**           **22 OKETOPA 2023**

**MATAUPU:**       **UA FAAMANUIA IESU I TAMAITI**

**SINI:**              Ia malamalama le vasega i le alofa faamaoni o Iesu i tatou.

**TUSI FAITAU:**     Mareko 10: 13 – 16

**FESOASOANI MO FAIAOGA:**

A o i ai Iesu i lana galuega tala'i tamaiti, sa ia faatino ai le tele o vavega ma faamalolo i tagata mama'i. I le tasi aso, ua faapotopo Iesu ma ona so'o faatasi ma isi tagata i le fale. A o talatalanoa Iesu ma ona so'o, sa o ane ai tagata ma avatu tamaiti ia Iesu. Peitai, ua vavao e le au so'o i tagata ina ia aua nei latou avane tamaiti ia Iesu.

Fai mai ua tiga le finagalo o Iesu i le mea ua faia e lona auso'o; aua na Ia afio mai mo tagata uma e oo lava i tamaiti. Ua uma ona fetalai atu o Iesu e uiga i le malo o le Atua ona Ia siitia lea o tamaiti, ua faaee foi i ai ona aao ma faamanuia ia te i latou. E ese le alofa o Iesu i tamaiti a. E ui na vavao e le auso'o a ua finagalo lava Iesu ina ia o atu tamaiti sei faamanuia i ai.

Tamaiti, o le alofa o Iesu i tamaiti, na mafua ai ona ia faamanuia ia te i latou. E faapea foi i tatou, o lana faamanuia foi lea mo i tatou. Ua tatou maua ai ni matua e alolofa ia te i latou. Ua ia foa'iina foi mea lelei mo i tatou i lea aso, ma lea aso. O le ola ma le malosi ua tatou maua. A ia faapea foi ona tatou alolofa ia Iesu e ala i le tatou faia lea o amioga lelei. Le alofa lea o Iesu, na maliu ai ma toetu manumalo mai le oti ma le tuugamau, ina ia tatou maua le ola.

**GALUEGA FAATINO:**

Tali fesili mai i le Ioe po o le Leai mai le Tusi Faitau faapea foi le tala sa faamatalaina.

1.       Ua vavao e le au so'o tamaiti, ina ia aua nei o ane ia Iesu.

Tali:   Ioe.

2.       Sa fiafia Iesu ina ua vavao e le au'so'o tamiati.

Tali:   Leai

3.       Na tutuli e Iesu tamaiti ina ia o ese.

Tali:   Leai

4.       Na siitia e Iesu tamaiti ma faaee i ai ona aao ma faamanuia ia te i latou.

Tali:   Ioe.

**PESE:**       E alofa Iesu ia i tatou uma.

E alofa ia tamā, alofa ia tinā

O lou tuafafine, lou uso laititi

Alofa ia te oe, alofa ia te au

E alofa ia i tatou uma.

## A'OA'OGA:

1. E alofa Iesu ia i tatou uma.
2. Ia fai le amio lelei, e alofa mai ai Iesu ia te i tatou.

## UA FAAMANUIA IESU I TAMAITI



\*\*\*\*\*

**ASO SA:** **29 OKETOPA 2023**

**MATAUPU:** **UA FAALOTOTELE IOSUA MA KALEPO I LE NUU**

**SINI:** Ia malamalama le vasega, o le ola tumau i le Atua e maua ai le lototele.

**TUSI FAITAU:** Numera 14: 1 – 10 (mo le faiaoga)  
Numera 14: 6 – 9 (mo le vasega)

### **FESOASOANI MO FAIAOGA:**

Na malaga ese mai le nuu o Isaraelu mai le nuu o Aikupito ma agai atu i le nuu na folafolaina mai e le Atua e fai mo latou. Ua oo le malaga i Katesa i le vao o Parana, ona aauina atu lea e Mose o Iosua ma Kalepo, ma nisi o tagata e asiiasi i le nuu o Kanana.

Peitai, ina ua latou foi mai, na latou faamatala uiga ma vaai a i le nuu o Kanana. Fai mai, e moni o le nuu o lo o tafe ai le suasusu ma le meli. A o ona tagata, o tagata e tino ese ma le malolosi. O tala ia na popole ai tagata o Isaraelu ma fefefe, auā ua pala'a'ai. Ua latou muimui ia Mose ma Arona ma latou fai atu. Ana latou feoti lava i Aikupito ua sili atu nai lo le oti i le vao.

Fai mai na faapauu fao Mose ma Arona i luma o Isaraelu, a o Iosua ma Kalepo ua saei o la ofu ma fai atu i le nuu. O le nuu na latou asiiasi I ai, o le nuu e matua lelei lava. Afai e alofa mai le Alii ia te i latou, na te faaoo lava i latou i lena nuu ma foai mai mo i latou. O le faalototetele atu lea a i laua nei mo le nuu. A tumau o latou loto i le Atua, e leai lava se mea e faigata ia te I latou. Po o le a foi le malolosi o tagata, e faatoilaloina lava e le Atua.

E faapea foi i tatou le fanau, e tele ma anoanoa'i mea e tupu ai lo tatou popole ma fefefe. A ia tatou loto tetele, e i ai lava le Atua mo i tatou, tatou te manumalo ai so o se mea.

### **Uiga o Upu ma Fuaitau:**

- |       |                  |   |                          |
|-------|------------------|---|--------------------------|
| i)    | fetautalatalaa'i | - | talanoa                  |
| ii)   | muimui           | - | tomumu                   |
| iii)  | tagata o taua    | - | ave faapologa            |
| iv)   | faaootia         | - | momoli, faaoo, ave       |
| v)    | fouvale          | - | agaleaga, fulitua, o ese |
| vi)   | matatau          | - | fefe, palaii             |
| vii)  | fa'aali          | - | faailoa                  |
| viii) | fetogi           | - | tau'ai                   |

### **GALUEGA FAATINO:** PASO

Saili mai upu nei i le Paso o lo o i lalo

Iosua	Arona	Isaraelu
Kalepo	Kanana	Muimui
Nuno	Suasusu	
Mose	Meli	

L	M	N	K	A	N	A	N	A
E	S	O	U	F	M	P	U	R
A	U	P	L	N	M	S	I	O
K	A	L	E	P	O	V	T	N
H	S	K	R	I	S	U	L	A
T	U	P	N	M	E	L	I	M
I	S	A	R	A	E	L	U	H
M	U	I	M	U	I	N	A	T

**PESE:** A tumau ia Iesu

**A'OA'OGA:**

1. Ia tatou tumau i le Atua.
2. Tatou lototetele, aua e au le Atua ma i tatou.
3. Aua le palaai gofie.

## UA FAAMALOSI IOSUA MA KALEPO I LE NUU



\*\*\*\*\*

## **MANATU TAIALA MO NOVEMA: FAATALITALI MA LE FAATUATUA**

O le tagata soifua, e faatalitali mea uma i le alofa tunoa o le Atua. O tatou faamoemoega uma, tatou te tuu i luma o le Atua. Tatou te galulue foi ma le onosai, aemaise lo tatou faatuatuaga i le Atua. O Ia e faamanuia mai ia i tatou. Po o le a lava la le taimi, o le aso e finagalo i ai le Atua, a o i tatou; tatou te faatalitali ma le faatuatua, e le tulafoa'iina i tatou e le Atua.

**ASO SA:** **5 NOVEMA 2023**

**MATAUPU:** **O TAUPOU E TOASEFULU**

**SINI:** Ia malamalama le vasega i le taua o le ola saunia i taimi uma.

**TUSI FAITAU:** Mataio 25: 1 – 13 (mo le faiaoga)  
Mataio 25: 1 – 5 (mo le vasega)

### **FESOASOANI MO FAIAOGA:**

O lenei taeao tamaiti, o le a tatou talanoa ai, i le tala e uiga i taupou e toasefulu. O le taupou tamaiti, e tutusa lelei lava ma le tamaitai, po o le teine foi e lei faia se toalua. Ua fetalai Iesu, fai mai sa i ai ni taupou e toasefulu. Sa o e faafetaiai pe faafetaui i le faatoafaiavā po o le tamaloa faatoa uma ona faaipoipo atu i se tamaitai.

O taupou ia e sefulu, e popoto le isi toalima ae valea le isi toalima. Na mafua ona faamatalaina faapea nei taupou, ona latou te le'i mautinoa lelei le taimi e taunu ai le faatoafaiavā. O taupou popoto la, na latou ave a latou moli faatasi ma fagu suauu nei uma le suauu e momoe ai le moli, a o lo o i ai le isi suauu e toe utu ai. O le isi toalima valea, ua nao latou moli lava, ae lei tapenaina ni a latou suauu faaleoleo. E taunu mai la le faatoafaiava, ua toe na o I latou na iai a latou suauu faaleoleo, ae foi mai le isi toalima na o e faatau mai nisi suauu, ua tapunia le faitotoa ma le maua ai so latou avanoa I totolu o le fale.

O se a'oa'oga taua foi lea mo i tatou le fanau. E taua lo tatou sauni I taimi uma. E pei lava ona feagai tatou ma a'oa'oga, ia toaga e fai mea aoga ina ia oo mai suega, ae ua saunia uma o tatou mafaufau mo suega.

### **Uiga o Upu:**

- |                      |   |  |
|----------------------|---|--|
| i) faafetaia'i       | - | faafetaui, feiloai                               |
| ii) faatoafaiavā     | - | tama faatoa uma ona faaipoipo                    |
| iii) taufaitulemomoe | - | fia momoe  |
| iv) tulua o po       | - | vaeluaga o le isi aso ma le isi aso. Leva le po. |
| v) alaga             | - | valaau   |
| vi) mamate           | - | pepe, le momoe                                   |
| vii) tausamaaga      | - | o se 'aiga tele                                  |
| viii) pupuni         | - | tapuni   |
| ix) mataala          | - | tapenapena, sauniuni                             |

**GALUEGA FAATINO:** Faatulaga Upu

Toe faatulaga upu ina ia sa'o lona faaleoga mai le tusi faitau.

<u>Upu</u>		<u>Tali</u>
1. pouuta	-	taupou
2. uuasu	-	suauu
3. limo	-	moli
4. topopo	-	popoto
5. lavea	-	valea


**PESE:** 1. Taopou e toa sefulu }  
Ma latou moli } x 2  
Na o e faafeiloai i le Alii  
Ua afio mai e asiasi

2. Taupou e toa sefulu  
Ma latou moli  
Toa lima na ave a latou suauu  
Toa lima e leai  
E lei maua se avanoa i totonu o le fale (fati: Savali ma oso)

## A'OA'OGA:

1. E taua le sauni i taimi uma.
  2. Aua le ola faatamala, a ia mataala.

## O TAUPOU E TOASEFULU



\*\*\*\*\*

**ASO SA:** 12 NOVEMA 2023

**MATAUPU:** UA FA'AALI LE AGELU IA PALAAMO

**SINI:** Ia malamalama le vasega, o agelu o ave feau ia a le Atua.

**TUSI FAITAU:** Numera 22: 1 – 35 (mo le Faiaoga)  
Numera 22: 26 – 33 (mo le Vasega)

### **FESOASOANI MO FAIAOGA:**

O agelu tamaiti, o avefeau ia a le Atua. Latou te momolia le finagalo o le Atua i se tagata, ua Ia finagalo e ta'u atu i ai le feau. O lona uiga, e tatau ona sa'o le tagata e ave i ai le feau. Ia sa'o foi le feau e avatu i ai e pei ona aumai e le Atua.

O le fa'aali la o le agelu ia Palaamo, e pei ona tatou faitauina mai le tusi faitau; o le faailoa atu lea o le toasa o le Atua ia Palaamo. O Palaamo o le tagata ua na iloa le Atua. Peitai, na alu i ai le feau a Palako le tupu o Moapi, e sau sei ona fetu'u ia Isaraelu, ina ua latou taunu i eleele o Moapi, o le latou malaga lea na o mai ai mai Aikupito e o atu i Kanana. Ua fefe ai Palako ona o tala ave o le malaga lea a Isaraelu i vavega na faia e le Atua.

Peitai, ua usitai Palaamo I le savali a Palako na tulai ai ma alu. Na tupu ai le lē fiafia o le Atua ma auina mai ai lana agelu e faafetaiai ia Palaamo i luga o le ala. Na faailoa ai le silisili ese o le Atua i le faatautalaina o le asini a Palaamo, ina ua ia sasa faatolu ia te ia, ae ua lē mafai ona alu ona o le agelu o lo o tu mai i le auala.

Ua faapupulaina e le Alii mata o Palaamo ma ia iloa ai le agelu. Ua ia faapaufao, ona faapea mai ai lea o le agelu ia te ia, “Se a ea le mea ua sasa faatolu ai lau asini? Faauta, o a'u nei ua ou sau e tete'e ia te oe, auā ua leaga lava lou ala i o'u luma. Na iloa mai foi a'u e le asini, ma ‘alo ese faatolu ia te a'u; ana le ‘alo ese o ia ia te a'u, po o penei ua ou fasiotia oe, ae faasao ia te ia.”

Ioe, tamaiti, na faailoa sa'o lava e le agelu le finagalo o le Atua ia Palaamo. Ia faapea foi i tatou, ia tatou tautala i le mea sa'o. Aua nei tatou fefefe e tautala i le mea sa'o. Ia tatou ‘alo ese mai le amio leaga, auā e lē fiafia mai ai le Atua.

### **Uiga o Upu:**

- |      |              |   |                                     |
|------|--------------|---|-------------------------------------|
| i)   | faapaufao    | - | ifo toele                           |
| ii)  | fasimatea    | - | fasi ia pe (upu e ave i meaola)     |
| iii) | faapupulaina | - | pupula                              |
| iv)  | faaonoono    | - | le usitai ua tupu ai le ita         |
| v)   | faagaganaina | - | faatautala                          |
| vi)  | va apiapi    | - | va itiiti, o se auala e le lautele. |

### **GALUEGA FAATINO:** Faatulagaga

Faatulaga fuaiupu nei mai le tusi faitau i lona tulaga sa'o.

1. Ona faagagana ai lea e le Alii o le asini.

2. Ua iloa e le asini le agelu a le Alii.
3. Ona toe alu ai lea o le agelu a le Alii.
4. Ona fai atu ai lea o Palaamo i le asini.

Tali: 3, 2, 1, 4

**PESE:** Na auina mai le agelu

Mai le Atua

Na auina mai le agelu

E ta'u atu lona toasa

Pala'amo ma lana asini ]

Ua agai atu i le ala ] x2

Ua sasa, ua sasa

Ua sasa, ua sasa

Ua sasa ia te ia lava

Le agelu ua tu mai le ala

Ma faailoa o le mala (fati: Na o si tama o Tavita)

**A'OA'OGA:**

1. Aua le fefe e tau atu le mea sa'o.
2. Ia fai i tatou ma avefeau a le Atua.

## UA FA'AALI LE AGELU IA PALAAMO



\*\*\*\*\*

**ASO SA:**           **19 NOVEMA 2023**

**MATAUPU:**       **O IESU LE LEOLEO MAMOE LELEI**

**SINI:**              Ia malamalama le vasega, ua na o Iesu lava le leoleo mamoe sili.

**TUSI FAITAU:**     Ioane 10: 11 – 18

**FESOASOANI MO FAIAOGA:**

O le leoleo mamoe, o le tagata lea na te vaia le lafu mamoe. E taitai i se laufanua e lelei ai se vao e aai ai mamoe. E faafeinu ma nofo e leoleo mamoe nei osofai e ni manu feai. O le tatou tusi faitau, o lo o talanoa ai Iesu e uiga i le leoleo mamoe lelei. Ua Ia fetalai foi, o Ia lava o le leoleo mamoe lelei.

Fai mai Iesu, e le tatau i le leoleo mamoe ona sola pe a o mai manu feai e pei o luko e faaleaga mamoe. Ia toa le loto o le leoleo mamoe e tuli ese ai manu feai ina ia saogalemu le ola o mamoe. Ia iloa foi e le leoleo mamoe le aofai o ana mamoe, ma ia masani mamoe i le leo o le leoleo mamoe. Ia foa'i atu foi le ola o le leoleo mamoe mo ana mamoe.

Tamaiti, o lea o lo o faamatala sa'o mai lava e Iesu. O Ia o le leoleo mamoe lelei, a o le tagata ua talitonu ma faatuatua i le Atua; o ana mamoe. E faapea foi i tagata uma lava, e tatau ona salamo ma faia le amio lelei, ona toe maua lea o le avanoa i totonu o le lafu mamoe lea a Iesu.

Tamaiti, o Iesu lava o le leoleo mamoe sili. E ui na tatou le vaai atu ia te Ia, ae o lo o leoleo mai pea o Ia ia te i tatou. O lona alofa ua tatou maua ai le ola ma le malosi. O le saolotoga e ala i le faaolataga ua aumaia mo i tatou.

**Uiga o Upu:**

- |                        |   |                     |
|------------------------|---|---------------------|
| i)       faasalalauina | - | faataapeape         |
| ii)      poloaiga      | - | tulafono, faatonuga |

**GALUEGA FAATINO:** Tusiga Fuaiupu

Fa'aaoga upu ua lisi atu e fai ai sau fuaiupu


1.       Iesu          2.       leoleo          3.       mamoe          4.       luko          5.       lelei.

**PESE:**              Sili oe, sili oe, Iesu  
                          Sa faapei o ita nei  
                          Sili oe sili oe, Iesu  
                          Ta fia pei foi o oe.

**A'OA'OGA:**

1.       O Iesu le leoleo mamoe lelei.
2.       O i tatou o mamoe mo Iesu.
3.       E leoleo mai pea Iesu ia te i tatou.

## O IESU LE LEOLEO MAMOE LELEI



\*\*\*\*\*

**ASO SA:** **26 NOVEMA 2023**

**MATAUPU:** **UA TATALO HANA I LE ATUA**

**SINI:** Ia malamalama le vasega, o le tatalo o le auala lea tatou te fesootai ai i le Atua.

**TUSI FAITAU:** 1 Samuelu 1: 9 – 18 (mo le faiaoga)  
1 Samuelu 1: 11 – 13 (mo le vasega)

**FESOASOANI MO FAIAOGA:**

Talofa tamaiti, o a mai outou i lenei taeao? Ia lelei, o le tatou mataupu i lenei foi Aso Sa, “UA TATALO HANA I LE ATUA.”

O le tatalo, o le tasi lenei o vaega taua o le ola tapuai o le tagata i le Atua. O se auala ua saunia e le Atua e fesootai atu ai le tagata ia te Ia. Sii la i luga lou lima pe afai e te iloa vaega e tolu ua vaevaeina i ai le tatalo. Sa’o lelei a, o le faafetai, faatoesega ma mana’oga. Tatou te tatalo e faafetaia le alofa o le Atua, ua tatou maua mai ai le ola ma le malosi. Tatou te faatoese foi i le Atua ona o a tatou amio leaga, ina ia alofa ma faamagalo mai i tatou. Tatou te tatalo foi, ma tuuina atu i le Atua mea tatou te manana’o ai, ina ia alofa ma faamanuia ma foai mai mo i tatou.

O le tala sa tatou faitauina mai le tusi faitau. O le tala e uiga i le tinā ia Hana. O lenei tinā, fai mai ua tele tausaga e leai sana fanau. Ona fai ai lea e Hana o lana masani lea, o le alu i le malumalu ma tatalo i le Atua ina ia foai mai se tama tane mo ia Afai e foa’iina e le Atua se tama tane mo ia, na te toe foa’i atu mo le Atua i aso uma o lona ola.

Ua outou iloa tamaiti, na foa’iina e le Atua mo Hana lana tama tane, auā sa tatalo ma le loto atoa Hana i le Atua. O se a’oa’oga taua foi lea mo i tatou le fanau. Ia tatou to’aga e tatalo. Ia tatou iloa ona faafetaia le alofa o le Atua ia te i tatou. Ia tatou lagona foi le loto maulalo e faatoese ai i le Atua, ona o a tatou amio leaga. Ia tatalo foi ma le loto atoa i le Atua i mea tatou te manana’o ai, auā e faamanuia mai lava o Ia ia i tatou. Ia tatalo i taimi uma ma so o se mea e te i ai.

**GALUEGA FAATINO:** Taliga Fesili

1. O fea sa tatalo ai Hana?

Tali: O le malumalu

2. Aisea na tatalo ai Hana i le Atua?

Tali: Ina ia foai mo ia se tama tane.

3. O ai le igoa o le toalua o Hana, o lo o taua i le tusi faitau?

Tali: O Elekana.

4. E fia vaega o le tatalo?

Tali: E tolu.

5. Lisi mai vaega e tolu o le tatalo.

Tali: Faafetai, Faatoesega, Mana’oga.

## A'OA'OGA:

1. Ia tatou to'a'aga e tatalo.
2. Ia tatalo ma le loto atoa.

## UA TATALO HANA I LE MALUMALU



\*\*\*\*\*

## **MANATU TAIALA MO TESEMA:      UA IA TE I TATOU LE ATUA**

Sa i ai le Atua i le lalolagi mai lona amataga. Faasolo mai ai lava seia oo mai ia Iesu, i lona maliu ma lona toetu mai i le oti ma le tuugamau. Na afio i le lagi ae auina mai le Agaga Paia, e saga faamausali ai pea le i ai o le Atua ia te i tatou. Po o a la faigata ma fita, e maua pea lo tatou mafanafana ona o lo o i ai pea le Atua ma i tatou.

ASQ SA: 3 TESEMA 2023

## MATAUPU: QIOANE LE PAPATISO

**SINI:** Ia malamalama le vasega, na auina mai Ioane e papatiso atu i tagata.

TUSI FAITAUI: Mareko 1: 4 – 8

## FESQASQOANJ MO FAIAOGA:

O le tatou tala i lenei taeao tamaiti, "O Ioane le Papatiso." O le galuega lea a Ioane na valaaui na ia e le Atua. O ia o se tagata mativa, sa ola i le vao. O lea o lo o faailoa mai o le tusi faitau e uiga i ona lavalava ma ana meaai.

E ofu i le fulufulu kamela ma le fusipa'u i lona sulugatiti. O ana meaai o le se akerise ma le meli vao. O lana paptisoga, e papatisoina tagata ina ia salamō mai i a latou amio leaga po o agasala. O lana galuega e teuteu ma faamama ai loto o tagata auā le afio mai o le Alii Faaola o Iesu. O lea e fai mai ai Ioane, o a'u nei ou te papatiso atu ia te outou i le vai, a o le mulimuli mai, na te papatiso ia te outou i le Agaga Paia. O le galuega a Ioane na faia i le vai o Ioritana.

Tamaiti, e le toe papatisoina i tatou aua ua uma ona papatisoina i tatou e le tatou faifeau, a o tatou laiti. A o le feau taua mo i tatou, ia tatou iloa ona salamō mai ia tatou agasala ma amio leaga e faia i lea aso ma lea aso. Ia faamama o tatou loto, ina ia mafai ona tatou faia o mea lelei e viia ai le Atua.

GALUEGA FAATINO:

Manaia pe a faatino le tala, ina ia mafai ona faamanino atili ai le fanau, e fautuaina foi le fesoasoani a lau susuga I le fajaoga.

**PESE:** O Ioane le papatiso  
Na alaga i le vao  
Tagata uma ia salamo  
Le auga lena  
O le galuega (fati: Manuia le Kerisimasi)

A'OA'OGA:

1. Teuteu o tatou loto mo Iesu.
  2. Ia tatou lagona le salamō faamaoni.

## O IOANE LE PAPATISO



\*\*\*\*\*

**MATAUPU:**      **UA FA'AALI LE AGELU IA MARIA**

**SINI:**                Ia malamalama le vasega, o le agelu na faailoa mai o Iesu o le a fanau mai ia Maria.

**TUSI FAITAU:**      Luka 1: 26 – 35

**FESOOASOANI MO FAIAOGA:**

O ona po o Herota le tupu o tagata Iutaia, na auina mai ai e le Atua lana agelu o Kaperielu ia Maria le taupou o le aiga o Tavita.

I le nuu o Nasareta i le aai o Kalilaia. Na le mautonu le mafaufau o Maria ina ua faapea atu le agelu o ia o le ua alofaina. Ua mafaufau loloto lava Maria po o le a le uiga o lea mea. A o le a foi se feau o le a aumaia e Kaperielu mo ia mai le Atua. Ua faailoa e le agelu le mea ua tupu ia Maria, ona faapea mai lea o ia, “Aua e te fefe, auā ua alofaina mai oe e le Atua. O le a to oe, ma e fanauina se tama tane, e te faaigoa ia te ia o Iesu.

O le tama lea e ta'ua, o le Alo o le Silisili Ese, o le tupu i le aiga o Iakopo e faavavau, o lona malo foi e leai sona gataaga. O le faamatalaina lea e le agelu o Iesu. Ua faailoa mai ai, o Iesu o le a fanau mai. O le Tupu o tagata uma, o Ia o le Alo o le Atua.

O le tatou tala lena tamaiti, ua faailoa e le agelu ia Maria. O le tama tane o le a ia fanau mai, o le Alo o le Atua. O Ia lea ua afio mai e faaola i le lalolagi. O le feau foi lea mo i tatou le fanau. Ia tatou faatuatua ma talitonu, o Iesu lava o le Alo o le Atua. Na afio mai e aumai le faaolataga mo i tatou ina ia mafai ona tatou ola fiafia ma le mautinoa, ua maua lo tatou avanoa i le lagi pe a faatuatua ia te Ia.

**Uiga o Upu:**

- |      |               |   |                                       |
|------|---------------|---|---------------------------------------|
| i)   | taupou        | - | tamaita'i/teine e lei faia se toalua. |
| ii)  | faufautane    | - | faamauina le faigao ae le i faaipoipo |
| iii) | atuatuvalale  | - | popole, fefe                          |
| iv)  | taumanatunatu | - | tau mafaufau                          |
| v)   | faamalumalu   | - | faapaolo                              |

**GALUEGA FAATINO:**

Faafetaui upu ma o latou uiga:

- |    |               |                 |
|----|---------------|-----------------|
| 1. | Kaperielu     | popole, fefe    |
| 2. | Maria         | tau mafaufau    |
| 3. | Iesu          | Alo o le Atua   |
| 4. | atuatuvalale  | tinā o Iesu     |
| 5. | taumanatunatu | agelu a le Atua |

**PESE:**                Na pepese agelu

## A'OA'OGA:

1. O Iesu o le Alo o le Atua.
2. O Iesu o le Faaola mo tagata uma.

## UA FA'AALI LE AGELU IA MARIA



\*\*\*\*\*